

Mak

ndê ñawaê ñayham

Yom whê ñawaê ñayham dindec sa-nga

Mak iñ Yisu ndê ñgacsêñomi 12 si dañ dom, magoc iñ tiatu yêc Jerusalem ma gêlic gêñ hoñ nañ Yisu kôm têtñ ndoc dinañ. Tiñambu Mak kêsêlêñ whiñ Pita têtñ ndoc Pita gêm mêtê, ma to ñawaê ñayham pi Yisu kêkuc mêtê nañ Pita gêm. Lau ñatô gauc gêm bu yom nañ Mak to yêc 14:51-52 nañ hêganôñ iñ dau. Tiñambu iñ gêm Pol lu Banabas sa tu iñlu si gwelêñ-nga. Alic yom ñatô pi iñ yêc Apo 12:12, 25; 13:5, 13; 15:36-39, ma yêc Kol 4:10 ma 2 Tim 4:11.

Mak to yom daêsam pi gwelêñ nañ Yisu kôm, magoc yom daêsam nañ Yisu sôm tu bu êndôhôn lau-nga, nañ iñ to dom.

Jon kêmasañ Yisu ndê señ

(*Mat 3:1-12; Luk 3:2-16*)

1 ¹Yom dindec gic hu ñawaê ñayham pi Anötö ndê Atu Yisu Kilisi. ²Muñ-nga, propet dañ to yom nañ Anötö sôm têtñ iñ ndê Atu bocdec bu:

Aö wakêñ aneñ ñgac aheñ-nga muñ am. Iñ oc êmasañ am nem señ.

[*Mal 3:1*]

Ma propet Aisaya to Anötö ndê yom pi ñgac aheñ-nga dau bocdec bu:

³Ñamalac dañ ta yom mbo gameñ sawa bocdec bu, ‘Amasañ Pômdau ndê señ tisolop. Amasañ nem ñalôm bu akôc iñ sa.’ [*Ais 40:3*]

⁴Yom dau ñandô sa pi Jon, ñgac Kêku Lau-nga, nañ tiñambu hôc asê ma gêm mêtê mbo gameñ sawa. Iñ sôm têtñ lau bu sêliñ sañgu tu bu sêtôc asê bu sêkac si ñalôm kwi ma sêhu mêtê sac siñ, dec Anötö oc suc ñac si sac kwi. ⁵Lau daêsam akêñ malac Jerusalem, ma akêñ malac hoñ yêc gameñ Judia-nga, sêsa sêtêñ Jon si. Ñac sêhoc si sac asê, ma iñ kêku ñac yêc Bu Jordan.

⁶Jon sôc ñakwê nañ sêmasañ ña kamel ñamliclu, ma kic piñkap yêc iñ ñampêbalê. Ma iñ gêñ gêñ bambaliñ gitôm wakô ma lêp. ⁷Iñ gêm mêtê

ma sôm têtj lau bocdec bu, “Ïgac daŋ oc meŋ êŋkuc aö, naŋ ndê ŋaclai hôc gêlêc aö neŋ su. Aö ŋgac ŋambwa dec gitôm dom bu wati iŋ ndê ŋgac akiŋ naŋ pôn sic ma kêgapwêc iŋ ndê atapa ŋawalö. ⁸Aö kaku mac ŋa bu ŋambwa, tigen iŋ oc êŋku mac ŋa Ïjalau Dabuŋ.”

Jon kêku Yisu

(*Mat 3:13-17; Luk 3:21-22; Jon 1:32-34*)

⁹Têtj têtj dinaŋ Yisu meŋ akêtj malac Nasaret yêc gameŋ Galili-ŋga, ma hôc asê Jon. Ma Jon kêku iŋ yêc Bu Jordan. ¹⁰Têtj ndoc Yisu pi akêtj bu meŋ, iŋ gêlic undambê kac sa, ma Ïjalau Dabuŋ gêm balusi aŋgö, ma sip têtj iŋ meŋ. ¹¹Goc awha daŋ sa akêtj undambê, naŋ sôm, “Aö Atuŋgac atac whiŋ-ŋga am. Aö gatisambuc am ŋandö.”

Sadaŋ kêsahê Yisu

(*Mat 4:1-11; Luk 4:1-13*)

¹²Dinaŋ su, goc Ïjalau wê Yisu sa gameŋ sawa gi, ma iŋ mbo tawasê. ¹³Tôm bêc 40 iŋ mbo gameŋ sawa, ma Sadaŋ kêsahê bu êntôm iŋ. Iŋ mbo whiŋ bôc gameŋ sawa-ŋga, ma aŋela sem akiŋ iŋ.

Yisu gic hu iŋ ndê gwelen

¹⁴Tiŋambu †Herod kêkiŋ iŋ ndê lau siŋ-ŋga bu sêkôc Jon dôŋ, ma sêkêtj iŋ ndôc gapocwalö. Têtj têtj dinaŋ Yisu gêm mêtê ma hoc Anötö ndê ŋawaê ŋayham asê têtj lau yêc gameŋ Galili-ŋga. ¹⁵Iŋ sôm, “Têtj naŋ Anötö kêyalij sa, naŋ meŋ sa su. †Anötö ndê gôliŋ meŋ kêpiŋ su. Bocdinaŋ anem nem ŋalôm kwi, ma akêtj whiŋ Anötö ndê ŋawaê ŋayham.”

Yisu mbwêc lauŋgac hale tu sêŋkuc iŋ-ŋga

(*Mat 4:18-22; Luk 5:1-11; Jon 1:35-42*)

¹⁶Têtj bêc daŋ Yisu kêsêlêŋ mbo Bugictoŋ Galili ŋamakê, ma gêlic Saimon lu asi Andru. Iŋlu ŋgac lu sêkôc i-ŋga, ma sem gwelen sêkêtj wasaŋ sip bu sêmbo. ¹⁷Ma Yisu sôm têtj iŋlu, “Amlu amêŋ aŋkuc aö, ma aö wakêtj amlu ahê ŋamalac sêmeŋ sêŋkuc aö, tôm naŋ kwahic dec amlu ahê i.” ¹⁸Ma ŋagahô iŋlu sêtec si wasaŋ yêc, ma sêŋkuc iŋ.

¹⁹Iŋ kêsêlêŋ ŋasawa sauŋ, ma gêlic Sebedi ndê atu lu, Jems lu Jon. Sêndôc waŋ daŋ ma sêmasaŋ si wasaŋ naŋ kic. ²⁰Yisu mbwêc iŋlu bu sêmeŋ sêŋkuc iŋ, goc sêhu damba Sebedi ti lau naŋ sêkôm gwelen sêwhiŋ iŋ, naŋ siŋ sêmbo waŋ, ma sêŋkuc Yisu.

Yisu kêdôhôn lau ma soc ŋalau sac yêc malac Kapenaom

(*Luk 4:31-37*)

²¹Yisu kôc lau hale dinaŋ ma sêŋsêlêŋ sêtêtj malac Kapenaom si. Sêhôc asê têtj bêc Sabat-ŋga daŋ, ma Yisu sôc †lôm wê-ŋga gi, ma gic hu

kêdôhôn lau. ²²Ma lau Kapenaom-nga sêhêdaê tu iñ ndê yom-nga, bu iñ kêdôhôn ñac gitôm kêdôhônwaga ti ñaclai atu, hóc gêlêc lau Israel si †kêdôhônwaga yomsu-nga hoñ su.

²³Ñgac dan ndóc lôm wê-nga dinañ, nañ ñalau sac mbo iñ ndê ñalôm. Iñ ta yom bocdec bu, ²⁴“Ei! Yisu Nasaret-nga. Aô kayalê am, am ñgac dabuñ nañ Anötö kêkiñ. Am bu kôm sake têtñ yac? Am mweñ bu señ yac su, a?” ²⁵Magoc Yisu hec yom ñalau sac ma sôm, “Am mamarñ ma hu iñ siñ!” ²⁶Goc ñalau sac kêmwananñ ñgac dau ti ñanña ma hu iñ siñ ti mbwêc atu.

²⁷Tu dinañ-nga lau hoñ sêhêdaê ma sêndac dandi, “Gêñ bocke dec? Iñ kêdôhôn yac ña lêtñ wakuc ma ti ñaclai atu. Ma iñ kóc ñaclai pi ñalau sac whiñ, bu iñ kêñ yatu ñac, ma sêsóc iñ ndê yom ñapu.” ²⁸Ma tiñambu lau sic miñ yom pi gêñ dau, e ñagahô eñ iñ ndê waê gêm gameñ Galili-nga hoñ ahuc.

Yisu gêm lau gêmbac daêsam sa

(Mat 8:14-17; Luk 4:38-43)

²⁹Ñac sêhu lôm wê-nga dinañ siñ, ma Saimon lu Andru sêkôc Yisu, Jems ma Jon ma sêtêtñ iñlu si andu si. ³⁰Saimon ndê lawawê gêmbac lic ñandê ma yêc andu dau ñalôm, ma lau sêkêtñ ñawaê têtñ Yisu. ³¹Bocdinañ Yisu têtñ iñ gi, kêm iñ sip amba ma keñ iñ sa. Ma gêmbac hu awhê dau siñ, ma iñ gêm akiñ ñac.

³²Têtñ telha dinañ têtñ ndoc ac gi sip, nañ lau malac-nga sêhoñ lau gêmbac daêsam ti lau nañ ñalau sac sêmbo si ñalôm, ma sêkôc ñac sêtêtñ Yisu sêmeñ.^a ³³Lau malac-nga hoñ sêkac dau sa, sêmbo andu dau ñamakê. ³⁴Ma Yisu gêm lau ti gêmbac tidau-tidau daêsam dinañ sa, ma soc ñalau sac daêsam su yêc lau. Tigeñ iñ kêñ yao ñalau sac bu sêsôm iñ asê dom, ñahu bu ñac sêñyalê bu iñ †Mesaya dau.

Yisu hu malac Kapenaom siñ

(Luk 4:42-44)

³⁵Têtñ ñagalañsê ac pi meñ su dom ma Yisu tisa ma hu malac dau siñ. Iñ sa gi bu mbo tawasê ma teñ mbec. ³⁶Saimon ma lau ñatô nañ sêwhiñ iñ, nañ sêsa si bu sêñsalê iñ. ³⁷Ma têtñ ndoc sêtap iñ sa, nañ sêsôm têtñ iñ bu, “Lau hoñ sêñsalê am.” ³⁸Magoc Yisu ô yom ma sôm, “Aô oc wambo malac tigeñ dinañ dom. Dalhö datêtñ malac nañ sêyêc gameñ ñamakê-nga dandi, bu wanem mêtê wambo dinañ. Tu gwelenñ dinañ-nga dec aô gameñ.”

^a **1:32** Lau Israel si yomsu Sabat-nga gic yao lau bu sêñsêlêñ señ baliñ me sêkôm gwelen têtñ bêc Sabat-nga dom. Magoc bêc Sabat-nga ña-yao pacndê têtñ ndoc ac gi sip. Tu dinañ-nga dec lau sêhôn e ac gi sip su, goc sêkôc si lau gêmbac sêtêtñ Yisu si.

³⁹Ma tiŋambu iŋ kêsêlêŋ golom-golom malac hoŋ yêc gameŋ Galili-ŋga. Iŋ gêm mêtê mbo lau si lôm wê-ŋga, ma soc ŋalau sac daêsam su yêc lau.

Yisu kôm ŋgac ti gêmbac leprasi ŋayham sa
(*Mat 8:1-4; Luk 5:12-16*)

⁴⁰Têŋ bêc daŋ, ŋgac ti gêmbac †leprasi daŋ têŋ Yisu gi. Iŋ pôn haduc ma teŋ Yisu bu nem iŋ sa. Iŋ sôm, “Am bu tac whiŋ, dec gitôm bu am oc kôm aô ŋamlic ŋawasi sa.” ⁴¹Yisu tawalô iŋ, dec kêmatôc amba sa gi ma kêmasec iŋ, ma sôm, “Aô atac whiŋ, dec wasôm têŋ am bu ŋamlic ŋawasi sa.” ⁴²Ma ŋagahô eŋ gêmbac dau hu iŋ siŋ, ma iŋ ndê ŋamlic ŋawasi sa. ⁴³⁻⁴⁴Goc Yisu kêkiŋ iŋ têŋ †dabuŋ-siga gi, ma sôm ti ŋaŋga têŋ iŋ, “Am ŋgô! Gêŋ naŋ kwahic dec hôc asê am, naŋ sôm asê têŋ lau daŋ dom. Tigeŋ têŋ dabuŋsiga ndi, ma tôc daôm têŋ iŋ bu lic bu am nem ŋamlic ŋawasi sa su. Ma kêŋ da tu am ŋamlic ŋawasi sa-ŋga tôm yomsu naŋ Moses kêŋ têŋ yac. Ma ŋalêŋ dinaŋ lau hoŋ oc sêŋyalê bu am ŋamlic ŋayham sa.” ⁴⁵Ma ŋgac dau sa gi ma gic miŋ pi gêŋ dau e yom dau tiapa. Tu dinaŋ-ŋga lau hoŋ takwê Yisu, dec iŋ tec bu sôc malac daŋ yêc lhu. Iŋ mbo gameŋ ŋamakê-ŋga, magoc lau akêŋ gameŋ hoŋ sêwê sêtêŋ iŋ si ŋapaŋ.

Yisu kôm ŋgac bôliŋ daŋ ŋayham sa
(*Mat 9:1-8; Luk 5:18-26*)

2 ¹Bêc ŋatô giŋga su, goc Yisu sôc malac Kapenaom tiyham. Ma lau malac-ŋga sêŋgô ŋawaê bu iŋ mbu meŋ ndôc andu daŋ. ²Goc lau daêsam sêkac dau sa, ma Yisu gêm mêtê ŋac. Lau daêsam andô sêkac sa e ŋasawa mba yêc andu ŋalôm ma yêc ŋasactô bocdinaŋ. ³Ma lauŋgac hale sêmbalaŋ ŋgac bôliŋ daŋ yêc sac daŋ sêmeŋ, ma bu sêtêŋ Yisu sêndi. ⁴Magoc lau daêsam dinaŋ sem gameŋ ahuc, ma tu dinaŋ-ŋga dec ŋac sêpi andu ŋapoc lôlôc si, ma sêkac poc sa ma sêmasaŋ ŋalasê daŋ yêc gameŋ naŋ Yisu kalhac, naŋ ŋahô-ŋga. Goc sêŋwhaŋ sac ti ŋgac bôliŋ sip têŋ Yisu gi. ⁵Yisu gêlic gêŋ dinaŋ ma kêyalê bu ŋac sêkêŋ whiŋ iŋ, goc sôm têŋ ŋgac bôliŋ, “Aneŋ balê, kwahic dec aô wasuc am nem sac kwi.”

⁶Têŋ ndoc dinaŋ kêdôhônŋwaga yomsu-ŋga ŋatô sêndôc andu dau. Sêŋgô Yisu ndê yom dau, ma gauc gêm yêc ŋac si ŋalôm, ⁷“Anötô tigeŋ gitôm bu suc sac kwi. Ma bocke ŋgac dindê sôm yom kaiŋ dinaŋ? Iŋ ndê yom sac sambuc.” ⁸Yisu kêyalê ŋagahô bu ŋac gauc gêm yom bocdinaŋ, dec iŋ sôm têŋ ŋac, “Tu sake-ŋga mac gauc gêm yom bocdinaŋ? ⁹Mac akêŋ whiŋ dom bu aneŋ ŋaclai yêc bu wasôm têŋ ŋgac bôliŋ dindêc bu wasuc iŋ ndê sac kwi. Bocdinaŋ aô wasôm têŋ iŋ, ‘Tisa, kôc nem mbô sa ma êmsêlêŋ.’ ¹⁰Ma têŋ têm mac alic aneŋ yom dau ŋandô sa, dec aŋyalê bu Anötô kêŋ ŋaclai têŋ †ŋamalac ndê Atu yêc nom, bu suc ŋamalac si

sac kwi whiŋ.” Goc Yisu sôm têtŋ ŋgac bôliŋ, ¹¹“Aö wasôm têtŋ am bu tisa, kôc nem mbô sa, ma lhö têtŋ nem andu ndi.” ¹²Ma ŋgac dau tisa yêc lau hoŋ aŋgô-ŋga, kôc ndê mbô sa ma kölhö gi. Gêŋ dau kôm lau hoŋ sêhêdaê ŋandô. Sêmpij Anötö ma sêsôm, “Gêŋ kainŋ dindec, yac alic daŋ su dom.”

Yisu kêgalêm Liwai bu êŋkuc iŋ

(Mat 9:9-13; Luk 5:27-32)

¹³Tiŋambu Yisu sa gi mbo bugictonŋ ŋamakê tiyham. Lau daêsam sêsa si sêŋkuc iŋ, ma iŋ kêdôhônŋ ŋac. ¹⁴Ma tiŋambu iŋ kêsêlêŋ gi e gêlic †Liwai, Alpayas ndê atuŋgac ndôc ndê mala kôc takis-ŋga. Goc Yisu sôm têtŋ iŋ, “Êmkuc aö.” Ma Liwai tisa ma kêkuc iŋ.

¹⁵Têtŋ bêc daŋ Yisu ti iŋ ndê ŋgacsêŋomi seŋ gêŋ sêndôc Liwai ndê andu. Ma lau sêkôc takis-ŋga ma lau daêsam naŋ lau bata Israel-ŋga sêsam bu lau sac naŋ sêndôc sêwhiŋ ŋac, bu lau kainŋ dinaŋ sêŋkuc Yisu tôm bêc hoŋ. ¹⁶Ma lau †Palêsai si kêdôhônŋwaga yomsu-ŋga ŋatô sêlic bu Yisu gêŋ gêŋ ndôc whiŋ lau takis-ŋga ti lau sac dinaŋ. Goc sêsôm têtŋ iŋ ndê ŋgac-sêŋomi, “Tu sake-ŋga iŋ gêŋ gêŋ whiŋ lau takis-ŋga ti lau sac?” ¹⁷Yisu ŋgô yom dau, ma sôm têtŋ ŋac, “Lau naŋ sêlic dau bu gêmbac mba, naŋ oc sêŋsalê dokta dom, magoc lau ti gêmbac oc sêŋsalê dokta. Aö gameŋ bu waŋgalêm lau naŋ sêlic dau bu lau gitêŋ, naŋ sa dom, aö gameŋ bu waŋgalêm lau sac sa.”

Yao gêŋ daney-ŋga-ŋga

(Mat 9:14-15; Luk 5:33-35)

¹⁸Jon, ŋgac Kêku Lau-ŋga ndê †sêŋomi ti lau Palêsai sêkêŋ bêc ŋatô bu sêney gêŋ dom tu gauc nem Anötö-ŋga, magoc Yisu ndê ŋgacsêŋomi sêkôm dom. Ma lau ŋatô sêmeŋ ma sêndac Yisu bocdec bu, “Tu sake-ŋga Jon ndê sêŋomi ma lau Palêsai si sêŋomi sêhu gêŋ daney-ŋga siŋ tu gauc nem Anötö-ŋga, magoc am nem ŋgacsêŋomi sêkôm dom?” ¹⁹Goc Yisu sôm têtŋ ŋac, “ŋgac nem awhê-ŋga daŋ bu êŋgalêm lau sa sêmbô sêwhiŋ iŋ bu sêney mwasiŋ nem awhê-ŋga, dec oc tôm dom bu sêhu gêŋ daney-ŋga siŋ têtŋ ndoc ŋgac dau mbo whiŋ ŋac. ŋjalêŋ tigeŋ kwahic dec aö gambo gawhiŋ aney ŋgacsêŋomi ma oc tôm dom bu sêhu gêŋ daney-ŋga siŋ. ²⁰Tigeŋ ndoc oc meŋ naŋ lau oc sêkôc aö su yêc ŋac, ma têtŋ ndoc dinaŋ ŋac oc ŋalôm ŋawapac, ma sêŋkuc lêtŋ dahu gêŋ daney-ŋga siŋ-ŋga.”

Yisu ndê yom gitôm gêŋ wakuc

(Mat 9:16-17; Luk 5:36-39)

²¹Ma Yisu sôm, “Yac dasi po wakuc pi ŋakwê akwa naŋ kic, naŋ dom. Bu po wakuc oc hôc ŋakwê akwa kic, ma gêŋ dau oc tisac sambuc. ²²Ma têtŋ ndoc lau s êmasaŋ wain wakuc, naŋ sêkêc sip bôc ŋamlic wain-ŋga

akwa dom. Mba! ñac bu sêkôm, goc wain wakuc oc hôc ñamlic akwa kôc ma wê sa ñiŋga. Ma bôc ñamlic oc tisac bocdinañ. Wain wakuc dakêc sip bôc ñamlic wakuc.”

Yisu iñ Pômdau bêc Sabat-nga

(Mat 12:1-8; Luk 6:1-5)

²³Têñ bêc Sabat-nga dañ Yisu ti ndê †ñgacsêñomi sêñsêlêñ sêmbo lôcwaha dañ nañ gic ôm wit-nga dañ kic. Ma iñ ndê ñgacsêñomi sêkôc wit ñandô ñatô bu sêñeñ. ²⁴Ma lau Palêsai ñatô sêlic gêñ dau ma sêsôm têt iñ, “Lic gêñ nañ am nem ñgacsêñomi sêkôm. Tu sake-nga ñac sêkôm gwelêñ nañ yac neñ yomsu gic yao bu dakôm têt bêc Sabat-nga dom?” ²⁵⁻²⁶Yisu ô ñac si yom ma sôm, “Gauc nem yom nañ sêto pi gêñ nañ Kij Dawid kôm. Mac asam su, me? Têt ndoc nañ Abiata iñ †dabuñsiga ñamata-nga, nañ Dawid ti lau nañ sêwhiñ iñ, nañ sêpônnda dau ma gêñ yô ñac. Goc Dawid sôc Anötö ndê andu gi, ma gêñ bolom dabuñ nañ lau sêkêñ ti da, nañ Moses kêt yao bu lau dabuñsiga tawasê oc sêñeñ. Ma iñ kêt têt lau nañ sêmbo sêwhiñ iñ, ma ñac señ. Magoc lau dañ sêñgôliñ yom pi Dawid ma sêsôm bu iñ kêgili yomsu lec dom.”

²⁷Ma Yisu gic têt yom ma sôm, “Bocdinañ akôc gauc ñapep pi yomsu. Anötö kêt bêc Sabat-nga bu nem ñamalac sa. Iñ kêt ñamalac tu bêc Sabat-nga dom. ²⁸Ñamalac ndê Atu iñ gêñ hoñ ñadau, ma iñ Pômdau Sabat-nga whiñ.”

Yisu kôm ñgac amba balê ñayham sa têt bêc Sabat-nga

(Mat 12:9-14; Luk 6:6-11)

3 ¹Têt bêc dañ tiyham Yisu sôc lôm wê-nga gi. Ma ñgac amba tibalê dañ ndôc. ²Palêsai ñatô sêñsalê yom bu sêñgôliñ pi Yisu, dec sêtîp iñ ñapep bu mboe iñ oc kôm ñgac dau ñayham sa têt bêc Sabat-nga, dec ñac oc sêsôm bu iñ kêgili yomsu Sabat-nga. ³Yisu sôm têt ñgac nañ amba tibalê, “Tisa, ma lhac ñalhu whiñ aô.” ⁴Dec iñ ndac lau hoñ bocdec bu, “Gêñ bocke oc êñgili yomsu Sabat-nga? Dakôm ñayham têt lau, me dakôm sac têt lau? Danem ñamalac sa, me datec ñac sêmbac ndu?” Magoc ñac hoñ sem dôñ. ⁵Iñ tahê ñac ma tac ñandê sa, ma ñalôm ñawapac tu ñac si ñalôm ñadandi-nga. Goc iñ sôm têt ñgac dau, “Êmatôc amam.” Ma ñgac dau kêmatôc amba, ma amba dau ñayham sa tiyham.

⁶Têt dinañ lau Palêsai sêhu lôm wê-nga dau siñ ma sêsa si. Ma ñac sêndôc sêwhiñ lau Israel-nga nañ tac whiñ Herod ma lau Rom-nga si gôliñ, ma ñac hoñ sêkôc gauc pi lêt sêndic Yisu ndu-nga.

Yisu kêdôhôn lau ma kôm gêmbac ñayham sa

(Luk 6:17-19)

⁷Yisu ti ndê ñgacsêñomi sêtêt bugictoñ si, ma lau daêsam sêñkuc ñac. ñac lau akêt gameñ Galili-nga ma gameñ Judia-nga, ⁸ma akêt malac

Jerusalem ma akêḅ gameḅ Judia ma Idumia-ḅga ma akêḅ Bu Jordan ḅadanaḅ, ma akêḅ malac Taya ma Saidon ḅagameḅ. Lau daêsam dinaḅ sêḅgô ḅawaê pi gêḅ naḅ Yisu kôm, dec sêsa sêḅêḅ iḅ si.

⁹Yisu gêlic lau toḅ atu naḅ bu sêḅgapiḅ iḅ sa, dec sôm têḅ ndê ḅgacsêḅnômi bu sêmasaḅ waḅ sauḅ daḅ tu iḅ pi ndi ndöc-ḅga. ¹⁰Iḅ sôm yom dinaḅ ḅahu bu iḅ kôm lau gêmbac daêsam ḅayham sa su e lau daêsam ti gêmbac sêkôm mwasac bu sêmasac iḅ. ¹¹Ma têḅ ndoc lau ti ḅalau sac sêlic iḅ, naḅ sêhu dau sêyêc iḅ aḅgô-ḅga, ma ḅalau dau sêmbwêc yom asê bocdec bu, “Am Anötö ndê Atu.” ¹²Tigeḅ Yisu kêḅ gic yao ḅanaḅ bu sêsôm iḅ ḅahu asê dom.

Yisu kêyaliḅ ḅgacsêḅnômi 12 sa

(Mat 10:1-4; Luk 6:12-16)

¹³Tiḅambu Yisu pi lôc daḅ gi ma mbwêc lau naḅ iḅ atac whiḅ, naḅ sêḅêḅ iḅ sêmeḅ. ¹⁴Goc iḅ kêyaliḅ ḅac si lau 12 sa, ma sam ḅac bu †Aposel, bu ḅac oc sêmbô sêwhiḅ iḅ, ma iḅ oc kêḅ ḅac sêsa sêndi bu sênem mêtê. ¹⁵Ma iḅ kêḅ ḅaclai têḅ ḅac bu sêsoc ḅalau sac su. ¹⁶Aposel 12 naḅ Yisu kêyaliḅ ḅac sa, naḅ bocdec: Saimon (naḅ iḅ sam bu Pita), ¹⁷Jems lu Jon (Sebedi ndê atu lu naḅ Yisu sam bu ‘wapap atui’), ¹⁸Andru, Pilip, Batolomeas, Matyu, Tomas, Jems (Alpayas ndê atu), Tadaus, Saimon (naḅ sêsam bu ‘ḅgac †Selot’), ¹⁹ma Judas Iskeriot, ḅgac naḅ tiḅambu hoc Yisu asê.

Lau sêḅgihî Yisu ahuc ḅapaḅ

²⁰Yisu sôc andu daḅ gi, magoc lau toḅ atu sêsap iḅ dôḅ ḅapaḅ e ḅasawa mba bu iḅ ti ndê ḅgac-sêḅnômi sêneḅ gêḅ. ²¹Gêḅ dau ḅawaê tap Yisu dinda ti asii sa, dec ḅac sêsôm, “Iḅ ndê gauc tisac.” Bocdinaḅ dec sêḅêḅ iḅ si bu sêkôc iḅ sa ndi.

Yisu ndê ḅaclai ḅahu

(Mat 12:22-32; Luk 11:14-22)

²²Têḅ têm dinaḅ kêdôhônḅaga yomsu-ḅga ḅatô sêmeḅ akêḅ Jerusalem ma sêḅgôliḅ yom pi Yisu bocdec bu, “ḅalau sac si ḅadau †Belsebal gêm gôliḅ iḅ, ma kêḅ ḅaclai têḅ iḅ bu soc ḅalau sac su.” ²³Goc Yisu mbwêc ḅac sêḅigasuc iḅ, ma ô ḅac si yom ḅa yom gôliḅ daḅ bocdec bu, “Bocke ma Sadaḅ oc soc Sadaḅ? ²⁴Gôliḅwaga daḅ ndê lau bu sêkêḅ kisa dau, dec iḅ ndê gôliḅ oc pacndê. ²⁵Ma gôlôwac daḅ bu sêwhê dau kôc, dec oc sêlhac ḅanaḅ dom. ²⁶Ma Sadaḅ bu kêḅ kisa têḅ dau ma whê dau kôc, dec iḅ oc lhac ḅanaḅ dom, iḅ ndê ḅaclai oc pacndê. ²⁷Aḅgô! Sadaḅ iḅ gitôm ḅgac ti licwalô atu, ma yac bu dasôc ḅgac ti licwalô atu daḅ ndê andu bu taḅgaho iḅ ndê gêḅ, naḅ gêḅ ḅamata-ḅga dasô iḅ dôḅ, goc taḅgaho iḅ ndê gêḅ.

28 “Yomandô aö wasôm têtj mac. Ijamalac naŋ kac ndê ŋalôm kwi ma hu ndê sac siŋ, naŋ Anötö oc suc iŋ ndê sac ti yom sac-sac hoŋ kwi. 29 Tigeŋ ŋamalac daŋ bu sôm yom sac pi Ijalau Dabuŋ, naŋ Anötö oc suc iŋ ndê sac kwi dom andô. Iŋ kôm gêtj sac sambuc, ma iŋ ndê giso oc yêc ŋapaŋ.”

30 Yom hoŋ dinaŋ Yisu sôm, ŋahu bu ŋac sêsôm bu ŋalau sac daŋ mbo iŋ ŋalôm.

Yisu dinda ti asii

(Mat 12:46-50; Luk 8:19-21)

31 Têtj têtj dinaŋ Yisu dinda ti ndê asii sêhôt asê andu dau. Sêlhac awê ma sêtjkiŋ ŋamalac daŋ sôt gi bu kôt iŋ sa sa meŋ. 32 Lau daêsam naŋ sêndöc sêtjgihi Yisu ahuc, naŋ sêsôm têtj iŋ bu, “Am dinam ti nem asimi dec sêmeŋ sêlhac awê ma sêndac am.” 33 Goc iŋ ndac ŋac, “Aneŋ dinaŋ ti asiŋi naŋ asa?” 34 Ma iŋ tahê lau naŋ sêndöc sêtjgihi iŋ ahuc, ma sôm, “Aneŋ dinaŋ ti asiŋi dau dindac. 35 Bu lau naŋ daŋga wambu Anötö ndê yom, naŋ ŋac sêti aö asiŋi ti lhuŋwêi ma dinaŋi.”

Yom gôliŋ pi ŋgac kêbalip wit ŋawhê

(Mat 13:1-12; Luk 8:4-8)

4 1 Tiŋambu Yisu sa gi mbo bugictöŋ ŋamakê, ma gic hu kêdôhôn lau tiyham. Ma lau sêwê-sêwê sêmeŋ e ti toŋ atu andô. Tu dinaŋ-ŋga iŋ pi waŋ daŋ gi poc bugictöŋ kêpiŋ baö, ma lau daêsam dinaŋ sêlhac baö.

2 Yisu sôm yom gôliŋ daêsam bu êndôhôn lau dinaŋ. Iŋ sôm yom gôliŋ daŋ têtj ŋac bocdec bu, 3 “Aŋgô! Iŋgac daŋ sa gi bu êmbalip wit ŋawhê yêc iŋ ndê ôm. 4 Têtj ndoc iŋ kêbalip gêtj dau, naŋ ŋawhê ŋatô sêpeŋ sêsip seŋ, ma mbac sêsip sêmeŋ ma seŋ su. 5 Ma ŋawhê ŋatô sêpeŋ sêsip gameŋ hoc-hoc, naŋ nom ŋagec sac hoc ŋahô ŋambwa. Iŋawhê dau sêsip nom ŋalôm gacgeŋ si dom, dec sêpo sêpi sêmeŋ ŋagahô. 6 Tigeŋ tiŋambu ac pec ŋagatôm ma gêm bôliŋ. Iŋahu bu nom ŋayham mba tu ŋawakac sip ndi-ŋga. 7 Ma wit ŋawhê ŋatô sêpeŋ sêsip kwaŋ ti ŋakwa ŋalôm, ma kwaŋ lu wit sêpi sêwhiŋ dau e kwaŋ yaŋ wit ndu ma gêm ŋandô daŋ dom. 8 Ma wit ŋawhê ŋatô sêpeŋ sêsip nom ŋayham, ma tiŋambu sem ŋandô daêsam, ŋatô sem ŋandô 30, ŋatô sem ŋandô 60, ma ŋatô sem ŋandô 100.”

9 Goc Yisu sôm, “Asa bu daŋga-suŋ yêc, naŋ ŋgô aneŋ yom.”

Yisu whê yom gôliŋ wit ŋawhê-ŋga ŋahu sa

(Mat 13:10-23; Luk 8:9-15)

10 Tiŋambu lau daêsam sêmbo dom, ma lau naŋ sêmbo sêwhiŋ Yisu, ti ŋgacsêŋomi 12 sêndac Yisu pi yom gôliŋ dau ŋahu. 11 Ma iŋ whê sa têtj ŋac bocdec bu, “Anötö ndê gôliŋ ŋalêŋ ŋahu sip ŋalôm gi. Iŋ kêyalij mac

sa bu anyalê nahu dau, magoc lau nanj sêmbö Anötö ndê göliŋ njalôm dom, nanj wasôm yom têtj nac na yom göliŋ nambwa. ¹²Aisaya to yom pi lau kainj dinan, nanj yêc bocdec bu:

Ŋac sêlic gêtj nanj aö gakôm, nanj napan, magoc nac si gauc sa dom.

Ma nac sêngô anej yom napan, magoc sênyalê nahu dom.

Ŋac bu sênyalê, dec oc tôm bu sênem dau kwi, ma Anötö oc suc nac si sac kwi.” *[Ais 6:9-10]*

¹³Goc Yisu sôm têtj nac, “Bocke dec mac anyalê yom göliŋ dinan nahu dom? Bocdinan njalên bocke mac oc anyalê yom göliŋ natô nahu? ¹⁴Anjgô! Yom pi nac nanj kêbalip wit nawhê, nanj hêganônj nac nanj hoc Anötö ndê yom asê. ¹⁵Ma yom pi wit nawhê nanj sêpej sêsip seŋ, nanj hêganônj lau nanj sêngô Anötö ndê yom, magoc nacahô Sadan meŋ ma kêgaho yom dau su yêc nac si njalôm. ¹⁶Ma wit nawhê nanj sêpej sêsip gameŋ hoc-hoc, nanj hêganônj lau nanj sêngô A nôtö ndê yom ma sêkôc sa nacahô ti atac nayham. ¹⁷Tigeŋ tôm wit nanj nawakac mbasi, nanj lau dau sêlhac nasawa baliŋ dom. Têtj ndoc sêtap nawapac sa, me lau sêkêŋ kisa nac tu Anötö ndê yom-ŋga, nanj sêhu si sêkêŋ whiŋ siŋ nacahô ej. ¹⁸Ma wit nawhê nanj sêpej sêsip kwanj ti nacwa njalôm, nanj hêganônj lau nanj sêngô Anötö ndê yom, ¹⁹tigeŋ sêhêgo dau pi gêtj nom-ŋga kêlêc, ma lêtj atac whiŋ mone ti wapa nom-ŋga hê nac si gauc napan e kôm Anötö ndê yom ahuc, ma nandô mbasi. ²⁰Ma wit nawhê nanj sêpej sêsip nom nayham, ma sem nandô 30, me 60, me 100, nanj hêganônj lau nanj sêngô Anötö ndê yom, sêkôc sa e tidônj, ma sem nandô daêsam.”

Dasiŋ lam nawê kwi dom

(Luk 8:16-18)

²¹Ma Yisu sôm têtj nac, “Lam iŋ gêtj pô gameŋ-ŋga, ma bocdinan yac tanjatôc na suc ahuc me dasiŋ kwi sôc sasac napu dom. Mba! Tanjinj êngalên nalu bu nawê pô gameŋ. ²²Ma njalên tigeŋ, yom nanj yêc siŋ dau me nahu sip njalôm gi, nanj oc meŋ sa tiawê. ²³Asa nanj danjasuŋ bu yêc, nanj ngô.”

²⁴Ma iŋ gic têku yom ma sôm, “Akôc gauc napap pi Anötö ndê yom nanj mac anjgô. Mac bu atac whiŋ bu anyalê nahu, dec Anötö oc kêŋ gauc têtj mac, ma iŋ oc kôm mac nem gauc êŋsôwec tiatu. ²⁵Bu asa nanj kôc Anötö ndê yom sa sip ndê njalôm e tidônj, nanj Anötö oc kêŋ gauc têtj iŋ êŋlêc. Magoc asa nanj kôc sa tidônj dom, nanj Anötö oc kôc iŋ ndê yom hoŋ su yêc iŋ.”

Yom göliŋ pi gêtj nawhê nanj po pi meŋ

²⁶Ma Yisu sôm, “Ŋjalên nanj Anötö ndê göliŋ kêsôwec, nanj gitôm gêtj nawhê nanj namalac danj sô sip ndê ôm. ²⁷Ma tinambu iŋ yêc bêc ôbwêc ma tisa têtj acsalô, ma nawhê dau po pi meŋ. Magoc namalac dau kêyalê

nalên dom. ²⁸Tên ñamata-nga ñawhê dau hóc nom kóc ma ñagatôm pi meñ, malô goc ñamlha sa ma tiñambu gêm ñandô. ²⁹Magoc tên ndoc gêm ñandô dau tilôwê iñ oc ndic su, bu bêc sêhoñ gêm ñandô sa-nga meñ sa.”

Yom gôliñ pi gêm ñawhê sauñ
(*Mat 13:31-32; Luk 13:18-19*)

³⁰Ma Yisu sôm, “Aô wasôm yom gôliñ bocke tu bu wawhê ñalên nañ Anötô ndê gôliñ kêsôwec, nañ sa? Aô wanem dôhôn pi gêm sake bu wawhê sa? ³¹Anötô ndê gôliñ gitôm gêm ñawhê sauñ andô dañ nañ dasô sip nom, gitôm a soc ñawhê. ³²Gêm dau gêm sauñ andô, tigen yac bu dasô sip nom ndi, dec oc po tiatu e hóc gêlêc gêm ôm-nga hoñ su. Ma ñasangac oc sêhê baliñ e mbac lôlôc-nga sêmeñ sêhê si ñaic yêc ayuñ ñayham dau.”

³³Yom gôliñ kaiñ dinañ Yisu sôm tên lau ñapañ. Iñ kêdôhôn ñac tôm ñac si gauc. ³⁴Yom hoñ nañ iñ sôm tên ñac, nañ iñ sôm ña yom gôliñ. Ma tên tên nañ iñ ti ndê ñgacsêñomi sêmbo tawasê, nañ iñ whê gêm hoñ sa tên ñac.

Yisu kôm bu ñamponñ timalô
(*Mat 8:23-27; Luk 8:22-25*)

³⁵Tên acsalô dinañ kêpiñ bu ñasec sa, nañ Yisu sôm tên iñ ndê ñgacsêñomi, “Yac dalhö, dapi bugictoñ ñadañga dandi.” ³⁶Goc sêhu lau toñ atu dinañ siñ ma sêkóc Yisu whiñ ñac sêpi wañ dañ ma sêlhö si. Ma wañ ñatô sêlac sêwhiñ. ³⁷Sêlac si ma mbu puc atu ma gêli bu ñamponñ sa gic sip wañ e kêpiñ bu wañ pac. ³⁸Magoc Yisu teñ gwalim ma yêc bêc yêc wañku-nga. ñgacsêñomi sêuñ iñ sa, ma sêsôm tên iñ, “Kêdôhônwaga, bocke? Am hêgo daôm dom bu yac oc dandiñaj, a?” ³⁹Goc iñ tisa, ma sôm yom ñañga tên mbu ti bu ñamponñ bocdec bu, “Nañ gitôm! Timalô!” Goc mbu timalô ma gameñ ñañeñ sa. ⁴⁰Ma iñ sôm tên ñac bu, “Tu sake-nga mac atöc daôm kêlêc? Bocke? Mac akêñ whiñ aô dom, a?” ⁴¹Magoc ñac sêsô ti sêtöc dau ñandô ma sêndac dandi, “Iñ asa dec? Gêm hoñ sêsôc iñ ndê yom ñapu, ma mbu ti bu ñamponñ sêwhiñ!”

Yisu kôm ñgac ti ñalau sac ñayham sa
(*Mat 8:28-34; Luk 8:26-39*)

5 ¹Yisu ti ndê ñgacsêñomi sêhóc asê Bugictoñ Galili-nga ñadañga tên gameñ ac pi-nga, ma sêsôc baö yêc lau Gerasa-nga si gameñ. ²Sêpi baö si, ma ñgac dañ nañ ñalau sac mbo iñ ndê ñalôm, nañ sa akêñ ôm sêhê-nga ma tên Yisu gi. ³Iñ ñgac dau êlême ndöc ôm sêhê-nga, ma tên daêsam lau sêñsahê bu sêsô iñ dôñ ña wac me ña sen, magoc gitôm dom. ⁴Tên daêsam sêsô iñ amba ti gahi dôñ ña sen, magoc iñ hê sen kic ma señ gapocwalô gahi-nga su. Lau dañ sêtôm dom bu sêkôm iñ timalô. ⁵Tên acsalô ti ôbwêc, iñ mbo ôm sêhê-nga ti gameñ ñabaö, ma tañ asê ma kóc hoc ma tuc-tuc dau ñamlíc tisac.

⁶Tên tên dinaŋ iŋ gêlic Yisu kalhac ahê, goc kêtî gi ma pôn haduc yêc iŋ aŋgô-ŋga. ⁷⁻⁸Ma Yisu sôm tên iŋ, “Ŋalau sac, am hu ŋgac dinaŋ siŋ.” Dec ŋalau dau mbwêc atu ma sôm, “Yisu, Anötö Ŋaclai ti Ŋawasi Ŋadau ndê Atu, am bu kôm sake tên aô? Tu Anötö ndê ŋaê-ŋga, aô wateŋ am bu kôm aô ŋayom dom.” ⁹Goc Yisu ndac iŋ, “Am nem ŋaê asa?” Ma ŋalau sac ô yom ma sôm, “Aneŋ ŋaê ‘Toŋ Atu,’ bu yac ŋalau daêsam.” ¹⁰Ma ŋalau dau teŋ Yisu tidim daêsam, bu soc ŋac su yêc gameŋ dinaŋ dom.

¹¹Tên tên dinaŋ bôc toŋ atu seŋ gêŋ sêmbo lôc ŋapu yêc gameŋ dinaŋ. ¹²Goc ŋalau sac sêteŋ Yisu ma sêsôm, “Êmkiŋ yac atêŋ bôc dindê andi, bu yac asôc bôc si ŋalôm.” ¹³Yisu gôlôc goc ŋalau sac sêhu ŋgac dinaŋ siŋ, ma sêsôc bôc ŋalôm si. Goc bôc hoŋ sênti si e sêsip salic sac, ma sêsip bugictoŋ e bu kô ŋac sêmbac ndu. Bôc dau toŋ atu, ŋanamba gitôm 2,000. ¹⁴Goc lau sêyob bôc-ŋga sênti si, ma sic miŋ yom dinaŋ tên lau naŋ sêmbo malac atu ti gameŋ ŋamakê-ŋga. Ma lau dau sêsa si bu sêlic gêŋ naŋ Yisu kôm. ¹⁵Sêhóc asê iŋ ma sêlic ŋgac naŋ Yisu soc ŋalau sac toŋ atu dinaŋ su yêc iŋ, naŋ ndôc ti gauc ŋawa ma sôc ŋakwê, dec ŋac sêtôc dau. ¹⁶Ma lau naŋ sêlic gêŋ dau, naŋ sic miŋ pi gêŋ naŋ Yisu kôm tên ŋgac ti ŋalau sac, ma tên bôc. ¹⁷Goc lau gameŋ dinaŋ-ŋga sêteŋ Yisu ŋaŋga bu hu ŋac si gameŋ siŋ.

¹⁸Tên ndoc Yisu bu pi waŋ ndi, naŋ ŋgac naŋ iŋ soc ŋalau sac su yêc iŋ, naŋ teŋ iŋ ŋaŋga bu whiŋ iŋ ndi. ¹⁹Magoc Yisu sôm, “Mba! Am mbu tên nem lau ndi, ma ndic miŋ tên ŋac pi ŋalêŋ naŋ Pômdau tawalô am, ma pi gêŋ hoŋ naŋ iŋ kôm tên am.” ²⁰Goc ŋgac dau kölhô gi, ma kêgihi gameŋ naŋ sêsam bu Dekapolis,^b ma gic miŋ yom pi gêŋ atu naŋ Yisu kôm tên iŋ. Ma lau hoŋ sêhêdaê.

Yisu kôm awhê lu ŋayham sa
(*Mat 9:18-26; Luk 8:40-56*)

²¹Yisu ti ndê ŋgacsêŋomi sêpi waŋ ma sêmbu sêpi bugictoŋ ŋadaŋga si. Ma tên ndoc iŋ sip baô gi, naŋ lau toŋ atu sêkac sa e sêŋgihi iŋ ahuc. ²²Ma ŋgac daŋ ŋaê Jairas, naŋ yob lau Israel-ŋga si lôm wê-ŋga yêc gameŋ dinaŋ, naŋ meŋ hóc asê. Iŋ gêlic Yisu goc hu dau sip nom yêc iŋ gahi-ŋga. ²³Ma iŋ teŋ iŋ ŋaŋga bocdec bu, “Aneŋ bawhê sauŋ gêmbac atu kêpiŋ bu oc mbac ndu. Aô tac whiŋ bu am mweŋ, kêŋ amam sac iŋ tu bu iŋ mbac ndu dom, ma ŋayham sa tiyham.” ²⁴Goc Yisu whiŋ iŋ gi.

Yisu kêsêlêŋ mbo, ma lau daêsam sêŋkuc iŋ ma sêŋgihi iŋ ahuc. ²⁵Lau toŋ dinaŋ si daŋ iŋ awhê naŋ gêm dac ŋapaŋ tôm yala 12. ²⁶Iŋ kêsâlê dokta daêsam bu sênem iŋ sa, ma gêmlihi ŋac e iŋ ndê mone hoŋ pacndê. Magoc ŋac sêtôm dom bu sênem iŋ sa. Iŋ hóc ŋandê atu tu ŋac-ŋga, ma

^b 5:20 Dekapolis - ŋaê dinaŋ danem kwi bu ‘malac amanlu.’ Malac amanlu dinaŋ sêyêc Bugictoŋ Galili-ŋga ŋagameŋ tên ac pi-ŋga.

gêmbac dau hóc gêlêc su. ²⁷⁻²⁸ Awhê dau ngô Yisu ñawaê su, dec gauc gêm têtj dau bu, “Aô bu wamasec inj ndê ñakwê, dec oc kôm aô ñayham sa.” Tu dinañ-nga inj kêsêlêñ yêc lau toñj atu ñalôm kêkuc inj, ma kêmasec inj ndê ñakwê. ²⁹ Ma ñagahô ej inj ndê dac sa tiyham dom, ma inj kêsahê bu inj ndê gêmbac pacndê su.

³⁰ Yisu kêyalê bu ñaclai sa yêc inj, goc ñagahô inj kac dau kwi yêc lau toñj atu ñalôm ma ndac, “Asa kêmasec aô neñ ñakwê?” ³¹ Magoc inj ndê ñgacsêñomi sêô yom ma sêsôm, “Lic lau daêsam dindec s êkôm am si. Bocke dec am ndac bu ñac si asa kêmasec am?” ³² Magoc Yisu taso lau hoñ, ma kêsalê ñamalac nañ kôm gêtj dau. ³³ Awhê dau kêyalê bu inj ñayham sa su, dec têtj Yisu gi ma pôn haduc yêc inj añgô-nga. Inj töt dau ti kêtitec mbo, ma hoc yom asê pi gêtj nañ inj kôm. ³⁴ Goc Yisu sôm teñ inj, “O aneñ bawhê, am nem kêtj whiñj aô dec kôm am ñayham sa. Am ndi ti atac malô, kwahic dec am nem ñawapac pacndê su.”

³⁵ Yisu sôm yom dinañ mbo, ma lau ñatô sêmeñ akêtj Jairas ndê andu, ma sêsôm têtj inj, “Am atômwê mbac ndu su. Tu sake-nga am bu kêtj ñawapac têtj Kêdôhôn-waga? Sôm têtj inj bu meñ dom.” ³⁶ Tigeñ Yisu hêgo dau tu ñac si yom-nga dom, ma sôm têtj Jairas, “Töt daôm dom, kêtj whiñj.” ³⁷ Goc Yisu kalhac lau hoñ ahuc, ma kôc Pita, ma Jems lu ndê asidôwa Jon, ma sêwhiñj Jairas si. ³⁸ Sêñsêlêñ si e sêhóc asê Jairas ndê andu, ma Yisu gêlic lau sêkôm ñanta atu, ñac sêhu dañgibo asê ma sêtañ. ³⁹ Goc inj sôc gi ma ndac ñac, “Mac akôm ñanta ti dañgibo atu dindec tu sake-nga? Bawhê dau mbac ndu dom, inj yêc bêc nañ yêc.” ⁴⁰ Magoc ñac sêmbwac inj. Yisu kêtj ñac sêsa awê si, ma kôc bawhê ñadamba lu dinda ti ñgacsêñomi töt dinañ sêwhiñj inj si, ma sêsôc ñalôm nañ bawhê yêc. ⁴¹ Inj kêm bawhê dau sip amba ma sôm têtj inj, “Talita, k umi.” (Yom Hibu dau danem kwi bu, ‘Bawhê sauñ, am tisa.’) ⁴² Ma ñagahô ej bawhê dau, nañ ndê yala ti 12, nañ tisa ma kêsêlêñ. Ma lau hoñ nañ sêlic gêtj dau, nañ sêhêdaê ñandô. ⁴³ Magoc Yisu kêtj yao ñañga bu sêsôm gêtj dau asê têtj lau ñatô dom. Ma inj sôm bu sêkêtj gêtj daneñ-nga têtj bawhê dau neñ.

Yisu ndê lau sêkôc inj sa dom

(*Mat 13:54-58; Luk 4:16-30*)

6 ¹ Yisu mbu têtj inj ndê malac-hu gi, ma inj ndê ñgacsêñomi sêñkuc inj. ² Têtj bêc Sabat-nga dañ inj sôc lôm wê-nga gi, ma gic hu kêdôhôn lau. Ma lau daêsam nañ sêñgô inj ndê yom, nañ sêhêdaê ma sêsôm têtj dandi, “Aluê! Inj ñgac dec tap gêtj hoñ dindec sa yêc nde? Asa kêtj gauc atu-tu dinañ têtj inj, ma ñaclai tu kôm gêtj dalô-nga? ³ Inj yac neñ ñgac nañ muñ-nga kôm gwelêñ kapenta-nga. Inj Maria ndê atungac, ma Jems, Josep, Judas ma Saimon dôwa! Ma inj ndê lhuwêi sêmbô sêwhiñj yac.” Ma ñac atac lu-lu tu inj-nga. ⁴ Goc Yisu sôm têtj ñac, “Lau hoñ sêtoc propet dañ sa, tigeñ yêc inj ndê malachu, inj ndê asidôwai ma inj dau ndê lau

sêtoc inj sa dom.” ⁵Ma yêc gameŋ dinaŋ inj gitôm dom bu kôm gêŋ dalô daêsam. Inj kêŋ amba sac lau gêmbac tigeŋ-tigeŋ, ma kôm ŋac ŋayham sa. ⁶Ma inj hêdaê bu ŋac sêkêŋ whiŋ inj dom.

Tiŋambu inj kêsêlêŋ golom-golom malac, ma kêdôhôn lau.

Yisu kêkiŋ ŋgacsêŋomi 12 sêsa si

(Mat 10:7-11; Luk 9:1-5)

⁷Yisu mbwêc ndê ŋgacsêŋomi 12 sêtêŋ inj sêmeŋ, ma inj kêkiŋ ŋac lu-lu sêsa sêtêŋ malac ŋatô si, bu sênem mêtê lau. Ma inj kêŋ ŋaclai têŋ ŋac bu sêsoc ŋalau sac su yêc lau. ⁸⁻⁹Inj kêkiŋ ŋac ti sôm yom têŋ ŋac bocdec bu, “Aŋsêlêŋ andi, magoc akôc wapa daêsam dom. Asôc nem atapa ma akôc nem tôc, dec tôm. Ampwic hacgêlê dom, ma akôc gêŋ daneŋ-ŋga me awa me ŋakwê aô daôm-ŋga dom. ¹⁰Têŋ ndoc mac asôc malac daŋ andi, ma lau sêkôc mac sa asôc ŋac si andu, naŋ ambo whiŋ ŋac e mac ahu malac dau siŋ. ¹¹Ma lau malac daŋ-ŋga bu sêkôc mac ti nem yom sa dom, goc atonj kop su yêc gahim têŋ ndoc mac ahu ŋac siŋ, bu atôc ŋac si giso asê.”

¹²Goc ŋac sêlhô si ma sem mêtê bu lau sênem si ŋalôm kwi ma sêhu mêtê sac siŋ. ¹³Sêsoc ŋalau sac daêsam su yêc lau, ma sêmbac olib ŋakwi pi lau gêmbac daêsam ma sêkôm ŋac ŋayham sa.

Herod gauc gêm yom daêsam pi Yisu

(Mat 14:1-2; Luk 9:7-9)

¹⁴Lau sic miŋ pi Yisu ŋapaŋ e inj ndê waê tiapa, ma Kiŋ Herod ŋgô ŋawaê pi inj whiŋ. Lau ŋatô sêsôm bu, “Yisu inj Jon, ŋgac Kêku Lau-ŋga, naŋ tisa akêŋ lau batê-ŋga, ma bocdinaŋ inj kôc ŋaclai bu kôm gêŋ dalô.” ¹⁵Ma ŋatô sêsôm, “Mba! Inj ŋgac dec inj propet Elaija naŋ tisa akêŋ lau batê-ŋga.” Ma ŋatô sêsôm, “Mba! Inj propet daŋ tôm propet akwa-kwa.” ¹⁶Magoc têŋ têm Herod ŋgô yom dinaŋ pi Yisu, naŋ inj sôm, “ŋgac dê mboe Jon, ŋgac naŋ aô gatim inj kachu kic, naŋ tisa akêŋ lau batê-ŋga.”

Herod gic Jon, ŋgac Kêku Lau-ŋga ndu ŋaminj

(Mat 14:3-12)

¹⁷⁻¹⁸Muŋ-ŋga, Herod kôc inj asi Pilip ndê awhê Herodias ma gêm ti ndê awhê. Dec Jon hoc Herod ndê giso asê ma sôm têŋ inj, “Am gêm nem asim ndê awhê, dec kôm gêŋ so sambuc.” Tu dinaŋ-ŋga Herod kêkiŋ ndê lau siŋ-ŋga bu sêkôc Jon dôŋ, ma sêkêŋ inj ndôc gapocwalô. ¹⁹Tu Jon ndê yom-ŋga, Herodias êlêmê tac ŋandê têŋ inj ma tac whiŋ bu sêndic inj ndu. Magoc inj gitôm dom, ²⁰bu Herod kêyalê bu Jon inj ŋgac gitêŋ ti dabuŋ, dec tôc Jon ma yob inj ŋapep. Herod tac whiŋ bu ŋgô Jon ndê yom, magoc Jon ndê yom kôm inj gauc gêm yom daêsam. ²¹Tiŋambu Herodias tap lêŋ daŋ sa bu lau sêndic Jon ndu. Têŋ Herod ndê bêc dinda kôc inj-ŋga, naŋ Herod ndê mwasiŋ daŋ ma kêgalêm inj ndê lau atu-tu, ti

lau bata siŋ-nga, ma lau bata Galili-nga. ²²Ŋac sêndôc mwasiŋ dau ŋalôm ma Herodias atuwê sôc meŋ ma tê wê. Gêŋ dau kôm Kiŋ Herod ti ndê ŋaclêŋ hoŋ atac ŋayham kêlêc. Goc iŋ sôm têŋ bawhê dau, “Am ndac gêŋ bocke naŋ am atac whiŋ, ma wakêŋ têŋ am.” ²³Ma iŋ kêmatiŋ yom têŋ iŋ bocdec bu, “Gêŋ naŋ am bu ndac, naŋ aô wakêŋ têŋ am, tôm aô wawhê neŋ wapa hoŋ kôc ndi toŋ lu ma wakêŋ toŋ daŋ têŋ am.” ²⁴Goc bawhê dau sa gi ma ndac dinda, “Aô wandac gêŋ sake?” Ma dinda ô yom ma sôm, “Am ndac Jon, Ŋgac Kêku Lau-nga ndê ŋagôlôn.” ²⁵Goc bawhê dau kac dau kwi ma kêti mbu têŋ Kiŋ Herod gi, ma sôm têŋ iŋ bu, “Aô tac whiŋ bu kwahic dec, am tim Jon, Ŋgac Kêku Lau-nga ndê kachu kic, goc kêŋ iŋ ndê ŋagôlôn sip pele daŋ ma kêŋ têŋ aô, bu walic pi tanôn bu iŋ mbac ndu ŋandô.” ²⁶Yom dau kôm Kiŋ Herod ŋalôm ŋawapac atu, tigeŋ tu iŋ kêmatiŋ yom yêc ŋaclêŋ hoŋ ŋgô-nga, dec kôm tôm bawhê dau ndac. ²⁷Ma ŋagahô iŋ kêkiŋ ŋgac daŋ bu ndic Jon ndu ma kôc iŋ ŋagôlôn mbu meŋ. Ŋgac dau sôc gapocwalô gi, tim Jon ndê kachu kic, ²⁸ma kêŋ ŋagôlôn sip pele daŋ. Goc kôc sa gi kêŋ têŋ bawhê, ma bawhê kêŋ têŋ dinda gêlic.

²⁹Têŋ têm Jon ndê sêŋomi sêŋgô gêŋ dau ŋawaê, naŋ sêmeŋ ma sêkôc iŋ ndê ŋamlaŋ sa, ma si sêŋsuhuŋ.

Yisu ndê ŋgacsêŋomi sêmbu sêmeŋ

³⁰Ŋgacsêŋomi naŋ Yisu kêkiŋ ŋac sêsa si, naŋ sêmbu sêtêŋ iŋ sêmeŋ, ma sic miŋ pi gêŋ hoŋ naŋ sêkôm, ma yom naŋ sêndôhôn têŋ lau. ³¹Têŋ têm dinaŋ lau daêsam sêwê sêtêŋ Yisu sêmeŋ ŋapaŋ, dec ŋasawa mba bu iŋ ti ndê lau sêneŋ gêŋ. Tu dinaŋ-nga dec iŋ sôm têŋ ŋac, “Mac tamwasêm awhiŋ aô, ma yac dasa gameŋ sawa daŋ dandi, ma taŋwhaŋ dauŋ.”

Yisu gôlôm lau 5,000

(*Mat 14:13-21; Luk 9:10-17; Jon 6:1-15*)

³²Bocdinaŋ ŋac sêpi waŋ daŋ bu sêlhô sêtêŋ gameŋ sawa daŋ sêndi. ³³Magoc lau daêsam sêlic ŋac sêpi waŋ ma sêŋyalê bu Yisu ti ndê lau. Bocdinaŋ lau akêŋ malac hoŋ yêc gameŋ dinaŋ sêŋkuc ŋac, sênti sêmbô baô ma sêhôn gêlêc ŋac. ³⁴Têŋ têm Yisu ti ndê ŋgac-sêŋomi sêsôc baô si, iŋ gêlic lau daêsam dinaŋ ma tawalô ŋac, bu ŋac sêtôm domba naŋ si ŋgac yob ŋac-nga mba. Dec iŋ gic hu kêdôhôn yom daêsam têŋ ŋac.

³⁵Sêmbô e telha sa, goc Yisu ndê ŋgacsêŋomi sêtêŋ iŋ si ma sêsôm, “Gameŋ dindec gameŋ sawa, ma ac pacndê. ³⁶Kêŋ lau dau sêlhô sêtêŋ malac ti gameŋ ŋamakê-nga sêndi, bu sênemlihi gêŋ sêneŋ-nga.” ³⁷Magoc Yisu sôm, “Mba! Mac daôm akêŋ gêŋ têŋ ŋac sêneŋ.” Ma ŋac sêô yom ma sêsôm, “Lau dindec ŋac lau daêsam andô! Yac bu anemlihi bolom ŋa mone atu gitôm †denarii 200, dec oc tôm bu ŋac hoŋ sêneŋ ŋagec-ŋagec.

Yac akôm bocdinaŋ, a?” ³⁸M a iŋ ndac, “Mac nem bolom hinga ndöc? Andi alic.” Ma ŋac si sêlic goc sêmbu sêmeŋ ma sêsôm, “Yac mba bolom limdaŋ, ma i lu sêndöc.”

³⁹Goc Yisu sôm têtŋ ŋac bu sêkêtŋ lau hoŋ sêndöc sic titoŋ-titoŋ sêndöc kwanŋ. ⁴⁰Ma lau hoŋ sêndöc sic titoŋ-titoŋ, toŋ ŋatô gitôm lau 100, ma ŋatô gitôm 50. ⁴¹Goc Yisu kôc bolom limdaŋ ma i lu sa, tatac undambê ma gêm mbec, goc pô bolom kôc-kôc, ma kêtŋ têtŋ ŋgacsêŋomi bu sêndic sam têtŋ lau. Goc iŋ kôm bocdinaŋ pi i lu. ⁴²Lau hoŋ seŋ gêtŋ e hóc ŋac dôŋ. ⁴³Ma tiŋambu ŋgacsêŋomi sic bolom ti i ŋadêlê sa sip gatop 12 e meŋhu.

⁴⁴Yisu gôlôm lau toŋ atu dinaŋ, ma lauŋgac naŋ sêmbo toŋ dau ŋalôm ma seŋ gêtŋ, naŋ si namba gitôm 5,000.

Yisu kêsêlêtŋ mbo bu ŋahô
(*Mat 14:22-33; Jon 6:16-21*)

⁴⁵Têtŋ têm dinaŋ Yisu kêtŋ ndê ŋ gacsêŋomi sêpi waŋ daŋ si, ma kêkiŋ ŋac sêmuŋ iŋ sêpi bugictoŋ ŋadaŋga, bu sêtêtŋ malac Betsaida sêndi. Ma iŋ dau mbo baö bu kêtŋ lau toŋ atu dinaŋ sêlhö si. ⁴⁶Iŋ hu ŋac siŋ su, goc pi lôc daŋ gi bu teŋ mbec.

⁴⁷Ŋasec sa su, ma waŋ dau sa bugictoŋ ŋalhu, ma Yisu tawasê mbo baö. ⁴⁸Iŋ gêlic ndê ŋgac-sêŋomi sêhêc waŋ ŋaŋga, bu mbu atu kêsêlêtŋ ma puc ŋac dôŋ. Têtŋ ôbwêc lôm iŋ kêsêlêtŋ mbo bu ŋahô, ma sa têtŋ ŋac gi. Iŋ bu hóc gêlêc ŋac, ⁴⁹magoc têtŋ ndoc sêlic iŋ kêsêlêtŋ mbo bu ŋahô, ŋac gauc gêm bu sêlic ŋalau daŋ. Ŋac sêmbwêc atu, ⁵⁰bu ŋac hoŋ sêlic iŋ ma sêtöc dau. Magoc ŋagahô iŋ sôm yom têtŋ ŋac bu, “Ŋalôm pêtŋ dôŋ ma atöc daôm dom, bu aö dauŋ dindéc!” ⁵¹Goc iŋ kêsêlêtŋ têtŋ ŋac ma pi waŋ gi. Ma mbu timalö ma binôŋ sip. Ŋac sêhêdaê ŋandô, ⁵²ŋahu bu ŋac sêlic gêtŋ naŋ iŋ kôm pi bolom ti i, magoc ŋac si gauc sa dom pi iŋ ndê ŋaclai. Ŋac si ŋalôm ŋadandi.

Yisu gêm lau gêmbac sa yêc malac Genesaret
(*Mat 14:34-36; Jon 6:22-25*)

⁵³Ŋac sêhóc asê malac Genesaret yêc bugictoŋ ŋadaŋga, ma sêsô waŋ dôŋ. ⁵⁴Ŋac sêsip baö si ma ŋagahô lau sêŋyalê bu Yisu. ⁵⁵Goc sênti sêtêtŋ malac hoŋ yêc gameŋ dinaŋ, ma sêkêtŋ Yisu ŋawaê. Ma tiŋambu lau sêmbalaŋ si lau gêmbac sêtêtŋ malac bocke naŋ sêŋgô bu Yisu mbo. ⁵⁶Ma malac atu ti sauŋ, me gameŋ ŋamakê-ŋga bocke naŋ Yisu mbo, naŋ lau sêtöc si lau gêmbac sêyêc maket ŋamala, ma sêteŋ Yisu bu ŋac sêmassec iŋ me bu sêmassec iŋ ndê ŋakwê ŋambwa. Ma lau hoŋ naŋ sêmassec iŋ, naŋ ŋamlic ŋayham sa.

Gêtŋ naŋ kôm ŋamalac ŋadômbwi sa yêc Anötö aŋgô-ŋga
(*Mat 15:1-20*)

7 ¹Lau Palêsai ti kêdôhônŋwaga yomsu-ŋga ŋatô akêtŋ Jerusalem sêtêtŋ Yisu si. ²Ma ŋac sêlic bu iŋ ndê ŋgacsêŋomi ŋatô sêŋgwasiŋ

amba dom ma seŋ gêŋ. Bocdinaŋ ɲac gauc gêm bu ɲgac-sêŋomi si amba ɲadômbwi. ³ɲac gauc gêm yom dinaŋ, ɲahu bu lau Palêsai ti lau Israel-ɲga daêsam sêŋkuc mêtê naŋ lau andô sic dulu têtŋ ɲac, bu sêŋgwasinŋ amba muŋ su, goc sêneŋ gêŋ. ⁴Ma têtŋ ndoc sêmbu akêŋ maket sêmeŋ,^c naŋ sêŋgwasinŋ amba muŋ, goc sêneŋ gêŋ. Ma ɲac sêŋgwasinŋ laclhu ti akôp ma suc, ma sêŋkuc mêtê kaiŋ dinaŋ daêsam, naŋ lau andô Israel-ɲga sic dulu têtŋ ɲac.

⁵Bocdinaŋ lau Palêsai ti kêdôhônŋ-waga yomsu-ɲga dinaŋ sêndac Yisu, “Tu sake-ɲga am nem ɲgac-sêŋomi sêŋkuc ɲagôlinŋ naŋ lau andô sic dulu têtŋ yac, naŋ dom, ma seŋ gêŋ ti amba ɲadômbwi?” ⁶Ma Yisu ô yom ma sôm, “Propet Aisaya hoc yom asê muŋ su, naŋ hêganônŋ mac lau atim yom lau-ɲga solop. Yom dau sêto yêc bocdec bu:

Lau dindéc sêtoc aô sa ɲa whasuŋ ɲambwa, tigeŋ ɲac si ɲalôm yêc daŋ dau-ɲga.

⁷ɲac sem akiŋ aô ɲandô dom, ma yom naŋ sêndôhônŋ têtŋ lau, naŋ ɲamalac si yomsu ɲambwa.” [Ais 29:13]

⁸Goc Yisu gic têku yom ma sôm, “Mac ahu Anötô ndê yomsu siŋ, ma asap ɲamalac ɲambwa si ɲagôlinŋ dôŋ. ⁹Mac alic ɲayham bu asap mac daôm nem ɲagôlinŋ dôŋ, magoc atec Anötô ndê yomsu, a? ¹⁰Bu Moses to Anötô ndê yomsu bocdec bu, ‘*Toc damam lu dinam sa.*’ Ma iŋ to yom daŋ whiŋ bocdec bu, ‘*ɲgac daŋ bu sôm yom sac pi iŋ damba lu dinda, naŋ lau sêndic iŋ ndu maŋ.*’ ¹¹Tigeŋ mac andôhônŋ lau bu sêŋgili yomsu dinaŋ. ɲamalac daŋ ndê awa me gêŋ bu yêc bu nem damba lu dinda sa, magoc iŋ bu ndic yao gêŋ dau ma sôm têtŋ iŋlu, ‘Gêŋ naŋ bu nem amlu sa, naŋ gasam bu Koban.’ (Yom Koban dinaŋ ɲahu bu iŋ kêyalinŋ gêŋ dau sa bu kêŋ ti da têtŋ Anötô.) ¹²Tu dinaŋ-ɲga iŋ gêm iŋ damba lu dinda sa dom, ma mac alic ɲayham. ¹³ɲalêŋ dinaŋ mac aseŋ Anötô ndê yom popoc ma aŋkuc lau andô si ɲagôlinŋ naŋ apami sic dulu têtŋ mac. Mac akôm mêtê daêsam gitôm dinaŋ.”

¹⁴Goc Yisu ta lau hoŋ sêtêŋ iŋ sêmeŋ tiyham, ma sôm, “Mac lau hoŋ, aŋgô ma aŋyalê. ¹⁵⁻¹⁶Gêŋ hoŋ naŋ yêc awê ma sip ɲamalac ɲatac ɲalôm, naŋ ɲadaŋ kôm iŋ ɲadômbwi sa yêc Anötô aŋgô-ɲga dom. Magoc mêtê ti gauc sac naŋ meŋ akêŋ ɲamalac ɲalôm, naŋ kôm iŋ ɲadômbwi sa yêc Anötô aŋgô-ɲga.”

¹⁷Tiŋambu Yisu hu lau dinaŋ siŋ ma iŋ ti ndê ɲgacsêŋomi sêsôc andu daŋ si. Goc sêndac iŋ pi yom gôlinŋ dinaŋ ɲahu. ¹⁸Ma iŋ ndac ɲac, “Bocdec mac atôm lau ɲatô naŋ si gauc sa dom? Alic bu gêŋ n aŋ yêc awê,

^c 7:4 Têtŋ ndoc lau Palêsai ma lau †Skraib sêmbu maket, naŋ semlhi gêŋ yêc lau Israel ɲatô naŋ sêhêgo dau tu Moses ndê yomsu-ɲga dom, ma †lau gameŋ apa-ɲga naŋ sêmbu maket ɲamala. ɲac gauc gêm bu lau dau oc sêkôm ɲac ɲadômbwi sa yêc Anötô aŋgô-ɲga, ma bocdinaŋ sêŋgwasinŋ amba têtŋ ndoc sêmbu akêŋ maket sêmeŋ.

ma sip ñamalac ñatac ñalôm, nañ oc kôm iñ ñadômbwi sa dom. ¹⁹Ñahu bu gêñ dinañ sip iñ ñalôm ti gauc dom, magoc sip iñ ñatac ñalôm goc tiñambu sa meñ tiyham.” (Yisu ndê yom dinañ tôc asê bu Anötö gic yao gêñ daney-ñga dañ bu gêñ ñadômbwi dom.)

²⁰Ma iñ gic têku yom ma sôm, “Gêñ sac bocke nañ sa yêc ñamalac si ñalôm me whasuñ, nañ kôm iñ ñadômbwi sa yêc Anötö aᅇgô-ñga. ²¹⁻²²Mêêtê sac daêsam ñahu yêc ñamalac si ñalôm. Gauc sac, mêêtê sênem kañ gêñ-ñga, sêndic ñamalac ndu-ñga, mêêtê mockaiñ-ñga nañ lau nañ sem dau sa su, ma lau nañ sem dau sa su dom nañ sêkôm, lêñ atac whiñ awa ti wapa-ñga, mêêtê sêlic lau sac-ñga ti sêñsau lau-ñga, mêêtê sêney gêñ ñawahô-ñga, mêêtê ñalôm ñagalac-ñga ti mêêtê lêmuñ-ñga, ma sêsôm yom sac-sac-ñga, mêêtê sêtoc dau sa-ñga, ma lêñ gauc mbasi-ñga. ²³Mêêtê sac kaiñ dinañ hoñ ñahu yêc ñamalac si ñalôm, ma kôm ñac ñadômbwi sa yêc Anötö aᅇgô-ñga.”

Awhê Kanan-ñga dañ kên whiñ ñaᅇga (*Mat 15:21-28*)

²⁴Yisu ti ndê ñgacsêñomi sêhu gameñ dinañ siñ, ma sêtêñ gameñ nañ yêc kêpiñ malac Taya ma sêsôc andu dañ si. Iñ tec bu lau dañ sêñyalê gameñ nañ iñ mbo, magoc iñ gitôm dom bu siñ dau. ²⁵⁻²⁶Awhê dañ mbo gameñ dinañ, nañ ñalau sac dañ mbo iñ atuwê ñalôm. Iñ awhê Grik-ñga nañ dinda kôc iñ yêc gameñ Sairo-Pionisia-ñga. Têñ ndoc awhê dau ñgô ñawaê pi Yisu, nañ têñ iñ gi, ma hu dau sip nom yêc iñ gahi-ñga. Ma iñ teñ Yisu ñaᅇga bu iñ soc ñalau sac dau su yêc iñ atuwê.

²⁷Ma Yisu sôm têñ iñ, “Gêñ ñamata-ñga dakêñ gêñ daney-ñga têñ balêkoc bu sêney e hóc ñac dôñ. Solop dom bu dakôc balêkoc si gêñ daney-ñga, ma tambaliñ têñ giam sêney.” ²⁸Magoc awhê dau ô yom ma sôm, “Yomandô Pômdau, magoc giam nañ sêndôc tebo ñapu, nañ señ gêñ ñapopoc nañ balêkoc sêñyaiñ sip nom.” ²⁹Goc Yisu sôm, “Tu am nem yom dinañ-ñga dec aô wanem am sa. Am mbu ndi ma am oc lic bu ñalau sac dau hu am atômwê siñ su.” ³⁰Goc awhê dau mbu têñ ndê andu gi, ma tap sa bu ñalau sac dau hu iñ atuwê siñ ma bawhê dau yêc bêc yêc ndê mbô.

Ñgac awha mba ma daᅇgasuñ bic

³¹Yisu ti ndê ñgacsêñomi sêhu malac Taya ñagameñ siñ. ñac sêñsêlêñ sêmbô señ têñ malac Saidon goc sêtêñ bugictoñ Galili-ñga, ma sêpi bugictoñ ñadaᅇga ma sêtêñ gameñ Dekapolis-ñga si. ³²Yêc gameñ dinañ lau ñatô sêkôc ñgac dañ daᅇgasuñ bic ma awha mba ma sêtêñ Yisu si, ma sêteñ iñ bu kên amba sac iñ. ³³Lau daêsam sêlhac dindê, goc Yisu kôc ñgac dau ma iñlu sêsa ñasawa sauñ si sêlhac dau-ñga. Ma iñ kên amba-atu sôc ñgac dau daᅇgasuñ, ma iñ hu gasôp pi amba-atu ma kên pi ñgac

dau êmbala. ³⁴Goc iŋ tatak undambê, sê awha atu, ma sôm têt iŋ bu, “Epata.” (Yom dau danem kwi bu ‘Po asê.’) ³⁵Ma ŋagahô iŋ daŋgasuŋ po asê, êmbala tigoloŋ, ma iŋ sôm yom yêc awê.

³⁶Yisu gic yao lau bu sêndic miŋ pi gêtŋ dinaŋ têt lau ŋatô dom, magoc sêsôc iŋ ndê yom ŋapu dom. Iŋ gic yao ŋac tidim daêsam, magoc ŋac sic miŋ pi iŋ hôc gêlêc su. ³⁷Ma lau hoŋ naŋ sêŋgô, naŋ sêhêdaê ŋandô ma sêsôm, “Iŋ kôm gêtŋ hoŋ ŋapep eŋ, ma gitôm bu kôm lau daŋgasuŋ bic sêŋgô yom, ma lau awha mba sêsôm yom asê.”

Yisu gôlôm lau 4,000

(Mat 15:29-39)

8 ¹Têt têt dinaŋ lau daêsam sêkac sa tiyham e lau toŋ atu sêmbo sêwhiŋ Yisu. Iŋ gêlic bu ŋac si gêtŋ sêneŋ-ŋga mba, goc ta ndê ŋgacsêŋomi sêtêtŋ iŋ sêmeŋ, ma sôm têtŋ ŋac bu, ²“Aô taŋwalô lau dindec, bu sêmbo sêwhiŋ aô gitôm bêc tō su, ma ŋac si gêtŋ sêneŋ-ŋga pacndê. ³Ma aô bu wakêtŋ ŋac sêlhô ti gêtŋ yô ŋac, dec ŋac oc tagôlô yêc seŋ. Iŋac si lau ŋatô sêmeŋ akêtŋ gameŋ baliŋ.” ⁴Magoc iŋ ndê ŋgacsêŋomi sêd iŋ ndê yom ma sêsôm, “Yac dambo gameŋ sawa, ma oc dakôc gêtŋ daneŋ-ŋga y êc nde, naŋ tôm bu lau hoŋ dindec sêneŋ?” ⁵Ma Yisu ndac ŋac, “Mac nem bolom hiŋga ndôc?” Ma ŋac sêsôm, “Yac mba bolom 7 sêndôc.” ⁶Goc Yisu sôm têtŋ lau bu sêndôc sic sêndôc nom. Ma iŋ kôc bolom 7 dinaŋ ma gêm daŋge, pô kôc-kôc, ma kêtŋ têtŋ ndê ŋgac-sêŋomi bu sêndic sam têtŋ lau, dec sic sam. ⁷Ma ŋac si i mwambwa ŋatô sêndôc, naŋ Yisu gêm mbec whiŋ, ma sôm bu sêndic sam têtŋ lau. ⁸Ma lau hoŋ seŋ e hôc ŋac dôn, goc ŋgacsêŋomi sic ŋadêlê sa sip gatop 7 e meŋhu. ⁹Laungac naŋ seŋ gêtŋ dau, naŋ si namba gitôm 4,000. Tiŋambu Yisu kêtŋ ŋac sêlhô si, ¹⁰ma iŋ ti ndê ŋgac-sêŋomi sêpi waŋ daŋ ma sêtêtŋ gameŋ naŋ sêsam bu Dalmanuta, naŋ si.

Lau Palêsai sêndac Yisu bu kôm gêtŋ dalô

(Mat 16:1-4)

¹¹Lau Palêsai ŋatô sêtêtŋ Yisu si, ma sic hu sêŋsu iŋ. Iŋac bu sêŋsahê iŋ, dec sêndac iŋ bu kôm gêtŋ dalô daŋ bu tōc asê bu iŋ kôc ŋaclai yêc Anötô ndê. ¹²Magoc Yisu h ulai ma sôm têtŋ ŋac, “Tu sake-ŋga mac lau têtŋ dindec-ŋga aŋsalê gêtŋ dalô? Yomandô wasôm t êŋ mac bu aô wakôm gêtŋ dalô tôm mac andac, naŋ daŋ dom.” ¹³Goc iŋ hu ŋac siŋ ma pi waŋ tiyham whiŋ ndê ŋgac-sêŋomi ma sêlhô bu sêmbu sêpi bugictôŋ ŋadaŋga sêndi.

Yisu puc lau Palêsai ti Herod si giso asê

(Mat 16:5-12)

¹⁴Têtŋ ndoc ŋgacsêŋomi sêpi waŋ dau si, naŋ sêŋliŋ dau siŋ bu sêkôc bolom ŋatô, ma ŋac si bolom tigeŋ yêc waŋ dau ŋalôm. ¹⁵Ma Yisu sôm

yom ti nãnga tẽj ñac bu, “Ayob daôm ñapep pi lau Palêsai si yist ma Herod ndê yist.” ¹⁶Ma ñac sem yomgalôm sêwhiñ dandi ma sêsôm, “Iñ sôm yom dinañ ñahu bu yac neñ bolom mbasi.” ¹⁷Yisu kêyalê yom nañ ñac sêsôm, dec sôm tẽj ñac, “Tu sake-nga mac am yomgalôm ma gauc gêm bu yom nañ aõ gasôm pi yist, nañ ñahu bu mac nem bolom mba? Bocke mac nem gauc sa pi gẽj hoñ nañ aõ gakôm, nañ dom? Mac nem ñalôm ñadandi sa, a? ¹⁸Tanôm yêc, magoc mac alic gẽj dañ ñapep dom. Dañamsuñ yêc, magoc mac añgô yom dom. Gauc nem gẽj nañ aõ gakôm su. ¹⁹Tẽj tẽm nañ aõ gac sam bolom amañdañ tẽj lau 5,000, nañ mac ahoñ ñadêlê sa sip gatop hiñga?” Ma sêsôm, “Gatop 12.” ²⁰Goc Yisu sôm, “Ma tẽj tẽm nañ aõ gac sam bolom 7 tẽj lau 4,000, nañ mac ahoñ ñadêlê sa sip gatop hiñga?” Ma sêsôm “Gatop 7.” ²¹Goc iñ sôm tẽj ñac, “Ma bocke dec mac nem gauc sa su dom?”

Yisu kôm ñgac tapec ñayham sa

²²Ñac sêlac wañ si e sêhóc asê malac Betsaida. Ma lau ñatô sêkóc ñgac tapec dañ sêtẽj Yisu si, ma sêndac Yisu bu kêñ amba sac iñ. ²³Goc Yisu kêñ iñ sip amba, ma wê iñ sa malac ñamakê gi. Iñ hê gasôp pi iñ tandô ma kêñ amba sac iñ, ma ndac, “Am gêlic gẽj dañ me mba?” ²⁴Ma ñgac dau hóc tandô sa ma sôm, “Aêc, aõ galic ñamalac sêñsêlêñ sêmbo, magoc galic ñac ñadauñ-dauñ. Aõ galic ñac sêtôm a.” ²⁵Goc Yisu kêñ amba sac iñ tandô tiyham, ma iñ tandô po asê ma ñayham sa. Ma iñ gêlic gẽj hoñ ñawa ñayham. ²⁶Goc Yisu kêñ iñ kôlhô gi ma sôm, “Am lhô solop tẽj nem andu ndi. Mbu sôc malac dec ndi dom.”

Pita hoc Yisu ñahu asê (Mat 16:13-20; Luk 9:18-21)

²⁷Tiñambu Yisu ti ndê ñgac-sêñomi sêlhô bu sêtẽj malac ñatô nañ yêc kêpiñ Sisaria-Pilipai sêndi. Sêñsêlêñ sêmbo señ ma Yisu ndac ñac bocdec bu, “Lau sêsôm bu aõ asa?” ²⁸Ma ñac sêsôm tẽj iñ, “Lau ñatô sêsôm bu am Jon, ñgac Kêku Lau-nga, ma ñatô sêsôm bu am Elaija, ma ñatô sêsôm bu am propet akwa-kwa si dañ.” ²⁹Dec iñ ndac ñac, “Ma mac daôm, mac asôm bu aõ asa?” Ma Pita ô iñ awha ma sôm, “Am Mesaya dau.” ³⁰Goc Yisu gic yao ñac bu sêsôm iñ asê tẽj lau dañ dom.

Yisu sôm gwanaj bu iñ oc hóc ñandê (Mat 16:21-23; Luk 9:22)

³¹Tẽj tẽm dinañ Yisu gic hu kêdôhôn ñac pi gẽj nañ oc hóc asê ñamalac ndê Atu. Iñ oc hóc ñawapac daêsam, ma lau bata Israel-nga ti ðdabuñsiga atu-tu ma lau nañ sêndôhôn yomsu oc sêtec iñ. Lau oc sêndic iñ ndu, ma tiñambu bêc tö niñga su iñ oc tisa tiyham. ³²Iñ sôm yom dinañ yêc awê, dec Pita kôc iñ sa ñasawa sauñ gi, ma sôm iñ. ³³Magoc

Yisu kac dau kwi, tahê ndê ngacsêñomi ma sôm Pita bocdec bu, “Sadan, kôc daôm sa lhô su! Bu am kêyalê Anötö ndê lêñ dom, am bu êmkuc ñamalac si gauc ñambwa.”

Lau nañ sêñkuc Yisu oc sêhóc ñawapac

(Mat 16:24-28; Luk 9:23-27)

³⁴Goc iñ mbwêc ndê ngac-sêñomi ti lau daêsam nañ sêñkuc iñ, nañ sêtêñ iñ sêmen, ma sôm têtñ ñac, “Asa nañ tac whiñ bu êñkuc aô, nañ êñgwiniñ dau ma hóc ndê a gicso dau sa, ma êñkuc aô. ³⁵Bu asa nañ tac whiñ bu sap gêñ nom-ñga dônñ ñapanñ tu mbo tali-ñga, nañ oc niñga. Magoc asa nañ bu hu gêñ nom-ñga siñ tu êñkuc aô-ñga ma tu ñawaê ñayham-ñga, nañ oc niñga dom. ³⁶Ñamalac dañ bu po gêñ nom-ñga hoñ sa, magoc iñ dau gatu bu niñga, dec gêñ nom-ñga hoñ dinañ oc tôm dom bu nem iñ sa. ³⁷Bu gêñ ñayham bocke yêc, nañ gitôm bu dakêñ têtñ Anötö ô yac neñ gatuñ?

³⁸“Lau têtñ dindec-ñga ñac lau sac, ma sêpuc dômbwê Anötö ma sêsa si lêtñ bambaliñ tôm lau mockaiñ-ñga. Asa nañ kwahic dec maya tu aô ti aneñ yom-ñga, nañ Ñamalac ndê Atu oc maya tu iñ-ñga têtñ ndoc ñambu-ñga nañ iñ mbu meñ ti Damba Anötö ndê ñawasi, ma añela dabuñ sêwhiñ.”

9 ¹Ma iñ sôm têtñ ñac, “Yomandô aô wasôm têtñ mac! Lau ñatô kwahic dec sêmbo, nañ oc gacgeñ sêmbo tali e sêlic Anötö ndê gôliñ meñ sa tiawê ma ti ñaclai atu.”

Pita, Jems ma Jon sêlic Yisu ndê ñawasi

(Mat 17:1-13; Luk 9:28-36)

²Bêc 6 giñga su goc Yisu kôc Pita, Jems ma Jon sêwhiñ iñ, ma ñac tawasê sêpi lôc baliñ dañ si. Têtñ têtñ dinañ Yisu ndê ñamlic kaiñ dañ sa, ma sêlic iñ ndê ñawasi. ³Iñ ndê ñakwê sêp sambuc ma ñawasi atu, hóc gêlêc gêñ sêsêp nom-ñga hoñ. ⁴Ma sêlic Elaija lu Moses sêhoc dau asê, ma iñlu sem yomgalôm sêwhiñ Yisu. ⁵Goc Pita sôm têtñ Yisu, “Kêdôhônñwaga, ñayham kêlêc bu yac dambo lec. Yac oc akwê bac tó tu mac ambo-ñga, am nem bac dañ, Moses nde dañ, ma Elaija ndê bac dañ.” ⁶Ñgacsêñomi tó dinañ sêtóc dau atu, ma bocdinañ Pita gêm gauc yom tu sôm-ñga. ⁷Têtñ dinañ dao dañ meñ kêgatóc ñac ahuc, ma awha dañ sa yêc dao ñalôm, nañ sôm, “Aô neñ atuñgac dau dindec, nañ aô atac whiñ ndu andô. Añgô iñ ndê yom mañ.” ⁸Ma ñagahô ñac tahê gameñ dau, ma sêlic bu Yisu tawasê mbo whiñ ñac.

Gêndac pi Elaija

(Mat 17:10-13)

⁹Tiñambu ñac sêsip akêñ lôc dau sêmen, ma Yisu kêtñ yao bu sêsôm yom pi gêñ nañ sêlic yêc lôc, nañ asê dom e tôm Ñamalac ndê Atu tisa

akêṅ lau batê-ṅga. ¹⁰Tu dinaṅ-ṅga ṅac sem yom dinaṅ ahuc yêc ṅac dau, magoc sem yomgalôm sêwhiṅ dandi ṅapaṅ pi gêṅ dau. ṅahu bu Yisu ndê yom pi iṅ tisa akêṅ lau batê-ṅga, naṅ sêṅyalê ṅahu dom.

¹¹Ma sêndac Yisu, “Lau Skraib naṅ sêndôhôn yomso, naṅ sêsôm bu Elaija oc meṅ hóc asê muṅ, ma tiṅambu Mesaya oc meṅ. Yom dau ṅahu bocke?” ¹²⁻¹³Ma Yisu sôm, “Elaija gic waê bu hóc asê muṅ Mesaya, bu êmasaṅ gêṅ hoṅ tisolop. Ma aô wasôm têṅ mac, bu Elaija meṅ hóc asê su. Ma lau sêkôm mêtê sac têṅ iṅ tôm ṅac atac whiṅ, tôm Anötö ndê yom naṅ sêto yêc gwanaj su. Ma yom naṅ sêto yêc pi ṅamalac ndê Atu naṅ sôm bu iṅ gic waê bu hóc ṅandê atu, ma lau oc sêpu iṅ ma sêtec iṅ. Mac ṅyalê yom dau ṅahu, me mba?”

Yisu soc ṅalau sac su yêc balê daṅ

(*Mat 17:14-21; Luk 9:37-43*)

¹⁴Yisu ma ṅgacsêṅomi tō dinaṅ sêsip akêṅ lôc dau sêmeṅ ma sêlic bu kêdôhônwaga yomso-ṅga ṅatō ma Yisu ndê ṅgacsêṅomi ṅatō sêsôm dau sêmbô, ma lau toṅ atu sêṅgihi ṅac ahuc. ¹⁵Têṅ ndoc lau hoṅ dinaṅ sêlic Yisu naṅ sêhêdaê ṅandô, ma sênti sêtêṅ iṅ si ti sêhê mwalêc iṅ. ¹⁶Ma Yisu ndac ṅac bu, “Mac asôm daôm pi yom bocke?” ¹⁷Ma ṅamalac daṅ naṅ mbo lau toṅ atu ṅalôm, naṅ ô yom ma sôm, “Kêdôhônwaga, aô gakôc aneṅ balê dindec gameṅ, bu ṅalau sac daṅ mbo iṅ ṅalôm ma kôm iṅ awha mba. ¹⁸Têm ṅatō ṅalau sac dau kôc iṅ dôn ma tuc iṅ sip nom gi, kôm iṅ whapwic sa ma seṅ lhô, ma iṅ amba ti gahi ṅaṅga sa. Aô gandac am nem ṅgacsêṅomi bu sêsoc ṅalau dau su, magoc ṅac sêtôm dom.” ¹⁹Yisu ṅgô yom dau ma sôm, “O mac lau, aô gambo gawhiṅ mac ṅasawa hic baliṅ su, ma bocke mac atôm dom bu akôm gêṅ daṅ? Aô wambo wawhiṅ mac ṅapaṅ dom! Mac nem akêṅ whiṅ mbasi. Akôc balê dau sa amêṅ.”

²⁰Dec sêkôc balê dau sêtêṅ Yisu sêmeṅ, ma têṅ têm ṅalau sac gêlic iṅ, naṅ ṅagahô iṅ kêmwanaṅ balê dau ti ṅaṅga, goc tuc iṅ sip nom gi, ma iṅ kêpi ti whapwic sa yêc nom. ²¹G oc Yisu ndac balê dau ṅadamba, “ṅalau sac kôm iṅ bocdinaṅ tôm yala hiṅga?” Ma damba sôm, “Iṅ mbo bocdinaṅ têṅ têm iṅ balêkoc sauṅ ṅapaṅ e kwahic dec. ²²Ma ndoc daêsam ṅalau sac dau tuc iṅ peṅ sip bu me sip ya, ma kôm bu ndic iṅ ndu niṅga. Tigeṅ am bu nditôm, dec tamwalô alu ma nem alu sa.” ²³Goc Yisu sôm têṅ iṅ, “Bocke dec am sôm têṅ aô, ‘Am bu nditôm?’ Mac bu akêṅ whiṅ, dec gêṅ hoṅ oc nditôm.” ²⁴Ma ṅagahô balê ṅadamba ta yom ma sôm, “Aô gakêṅ whiṅ. Nem aô sa bu wakêṅ whiṅ ṅaṅga.”

²⁵Yisu gêlic bu lau daêsam sênti sêmeṅ, dec hec yom ṅalau sac ma sôm, “Am ṅalau daṅgasuṅ bic ma awha mba-ṅga, aô wandic atu am bu hu balê dindec siṅ, ma sôc iṅ ṅalôm tiyham dom!” ²⁶Goc ṅalau sac dau mbwêc asê ma kêmwanaṅ balê dau ṅalêṅ sac, goc sa awê gi. Ma balê

dau yêc gitôm ngac batê dan, dec lau daêsam sêsôm, “Ij mbac ndu su.”
²⁷Tigej Yisu kêm ij sip amba, keŋ ij sa, ma ij tisa kalhac.

²⁸Tiŋambu Yisu sôc andu dan gi, ma ij ndê ngacsêŋomi sêndac ij gelec,
 “Bocke dec yac atôm dom bu asoc ŋalau dinaŋ su?” ²⁹Ma ij sôm, “Mac bu asoc
 ŋalau kain dinaŋ su, naŋ atej mbec ŋaŋga. Ŋalêŋ dan mba.”

Yisu sôm tiyham bu ij oc mbac ndu ma tisa

(Mat 17:22-23; Luk 9:43-45)

³⁰⁻³¹Yisu ti ndê ngacsêŋomi sêhu gameŋ dinaŋ siŋ, ma sêŋsêlêŋ sêmbô
 gameŋ Galili-ŋga. Yisu bu êndôhôn ŋac têŋ têm dinaŋ, dec tec bu lau
 sêŋyalê gameŋ naŋ ŋac sêmbô. Ij sôm têŋ ŋac, “Tiŋambu oc sêkêŋ
 Ŋamalac ndê Atu sip lau ŋatô amba. Ŋac oc sêndic ij ndu, magoc têŋ
 bêc tō nŋga su, ij oc tisa tiyham.” ³²Magoc ŋac si gauc sa pi ij ndê yom
 dom, ma sêtôc dau bu sêndac ij pi yom dau ŋahu.

Asa ti ŋamalac ŋamata-ŋga?

(Mat 18:1-5; Luk 9:46-48)

³³Ŋac sêŋsêlêŋ e sêhóc asê malac Kapenaom, goc si sêndôc andu dan. Ma Yisu
 ndac ŋac, “Mac aseŋ daôm pi gêŋ sake yêc seŋ?” ³⁴Magoc ŋac sem dôŋ, bu yêc
 seŋ ŋac sem yomgalôm sêwhiŋ dandi pi ŋac si asa ij ngac ŋamata-ŋga. ³⁵Yisu
 ndôc sic ma ta ngacsêŋomi 12 sêtêŋ ij si, ma sôm têŋ ŋac, “A sa naŋ bu ti ŋamalac
 ŋamata-ŋga yêc Anötö aŋgô-ŋga, naŋ êŋgwiniŋ dau ti ngac ŋambu-ŋga, ma nem
 akiŋ lau hoŋ.” ³⁶Goc ij kôc balêkoc sauŋ dan ma kêŋ ij kalhac ŋac ŋalhu. Ma ij
 kêgape ij ma sôm, ³⁷“Asa naŋ bu kôc balêkoc sauŋ dan tôm ij dindec, naŋ sa tu
 aô neŋ ŋaê-ŋga, naŋ gitôm ij kôc aô dauŋ sa. Ma asa naŋ kôc aô sa, naŋ kôc aô
 taŋwasêŋ sa dom, magoc kôc Damaŋ naŋ kêkiŋ aô gameŋ, naŋ sa bocdinaŋ.”

Lau naŋ sêkôm gwelenj tu Yisu-ŋga, naŋ sêwhê dau kôc dom

(Luk 9:49-50)

³⁸Têŋ bêc dan Jon sôm têŋ Yisu bu, “Kêdôhônŋwaga, yac alic ngac dan kôm
 gwelenj ma soc ŋalau sac su yêc lau ŋa am nem ŋaê. Yac ac yao ij, bu ij kêkuc
 am whiŋ yac dom.” ³⁹Magoc Yisu sôm, “Alhac ij ahuc dom, bu ŋamalac naŋ kôm
 gêŋ dalô ŋa aneŋ ŋaê, naŋ gitôm dom bu kac ndê awha kwi ŋagahô, ma sôm yom
 sac pi aô. ⁴⁰Asa naŋ kêŋ kisa yac dom, naŋ yac neŋ dan. ⁴¹Yomandô aô wasôm
 têŋ mac bu asa naŋ kôm gêŋ sauŋ dan bu nem mac sa tu mac aŋkuc aô Kilisi-ŋga,
 gitôm ij kêŋ bu laclhu dan têŋ mac anôm, naŋ Anötö oc êŋlhiŋ ij siŋ dom. Ij oc
 kêŋ ŋagêyô ŋayham têŋ ij.”

Puc pi lêtôm

(Mat 18:6-9; Luk 17:1-2)

⁴²Ma Yisu sôm, “Ŋamalac dan bu tim balêkoc sauŋ dan naŋ kêŋ whiŋ
 aô bu kôm mêtê sac, naŋ kôm giso atu. Oc ŋayham bu dasô hoc atu dan

pi iŋ kachu, ma tambaliŋ iŋ sip gwêc ndi niŋga. Ma bocdinaŋ oc tôm dom bu iŋ tim balêkoc dau, ma tiŋambu tap Anötö ndê matôc sa.

43-44 “Am amam bu kôm sac, naŋ tim kic. Am bu tap undambê sa, ma ndöc tamli ti amam gatuc, naŋ ŋayham hôc gêlêc am kôm sac ŋa amam lu-lu e am sip ya lambwam-ŋga naŋ sa ŋapaŋ, naŋ ndi. 45-46 Ma gahim bu kôm sac, naŋ tim kic. A m bu tap undambê sa, ma ndöc tamli ti gahim gatuc, naŋ ŋayham hôc gêlêc am kôm sac ti gahim lu-lu e Anötö tuc am sip ya lambwam-ŋga naŋ sa ŋapaŋ, naŋ ndi. 47 Ma am nem tanôm bu kôm sac, naŋ kip sa. Am bu ndöc Anötö ndê gameŋ undambê-ŋga ti tanôm tigeŋ, naŋ ŋayham hôc gêlêc am kôm sac ti tanôm lu-lu e Anötö tuc am sip lambwam ndi. 48 Yêc gameŋ dinaŋ lau oc sêhêc ŋandê ŋapaŋ, tôm yom naŋ Aisaya to yêc bocdec bu, ‘*Dombo oc mbac ndu dom, ma ya oc sa ŋapaŋ.*’

49 “Bocdinaŋ ayob daôm tu lêtôm-ŋga, bu Anötö oc kêŋ ya êmbô lau hoŋ,^d gitôm lau sêkêŋ gwêc so pi wata tu bu yêc ŋayham ŋasawa baliŋ. 50 Gwêc so dau iŋ gêŋ ŋayham, magoc ŋamakic bu niŋga, oc dakôm ŋamakic sa tiyham ŋalêŋ nde? Bocdinaŋ ambo lau nom-ŋga ŋalôm atôm gwêc so, ma ambo awhiŋ daôm ti yom malô.”

Anötö tec bu awhê lu ŋgac sêhu dau siŋ

(Mat 19:1-12)

10 ¹ Yisu ti ndê ŋgacsêŋomi sêhu gameŋ dinaŋ siŋ, ma sêtêŋ gameŋ Judia-ŋga si. Goc sêpi Bu Jordan ŋadaŋga naŋ yêc têŋ gameŋ ac pi-ŋga, naŋ si. Yêc gameŋ dinaŋ lau daêsam sêkac sa tiyham ma sêtêŋ iŋ si, ma iŋ kêkuc iŋ ndê mêtê ma kédôhôn ŋac.

² Ma lau Palêsai ŋatô sêmeŋ ma bu sêtim Yisu, dec sêndac iŋ bocdec bu, “Ŋgac daŋ bu hu ndê awhê siŋ, naŋ oc êŋgili yomsu, me mba?” ³ Ma Yisu ndac ŋac ô, “Moses to yomsu bocke?” ⁴ Goc sêsôm, “Moses sôm bu ŋgac daŋ gitôm bu to bapia hu nawhê siŋ-ŋga, goc hu ndê awhê siŋ.” ⁵ Ma Yisu sôm, “Aêc. Moses to yomsu dinaŋ tu mac nem ŋalôm ŋadandi-ŋga. ⁶ Magoc têŋ têm Anötö kêŋ undambê ti nom, naŋ iŋ kêmasaŋ ŋamalac ŋgac ti awhê. ⁷ Ma tu dinaŋ-ŋga ‘*ŋgac daŋ oc hu damba lu dinda siŋ, ma sap iŋ nawhê dôŋ, 8 ma iŋlu sêti gêŋ tigeŋ.*’ Yom dau whê sa bu iŋlu sêmbo sêtôm ŋamalac lu dom, iŋlu sêti gêŋ tigeŋ yêc Anötö aŋgô-ŋga. ⁹ Bocdinaŋ yham dom andô bu ŋamalac sêkac gêŋ naŋ Anötö dau kêŋ pitigeŋ, naŋ su.”

^d 9:49 Yom naŋ yêc ŋabatiiŋ 49 naŋ ŋahu yêc awê dom, magoc lau ŋatô gauc gêm bocdec bu. Anötö tac whiŋ bu lau sêkêŋ whiŋ Yisu-ŋga sêhu mêtê sac hoŋ siŋ ma sêsa lêŋ gitêŋ eŋ. Gêŋ bocke naŋ bu lhac ŋac ahuc tu sêtap gameŋ undambê-ŋga sa, naŋ sêhu siŋ tôm yom naŋ yêc ŋabatiiŋ 43-47 whê sa. Ma Anötö oc kêŋ ya êmbô lau gitôm lau sêpec gol ŋa ya tu bu ŋadômbwi niŋga ma gol ŋawasi solop yêc.

¹⁰Tijambu Yisu ti ndê ngac-sêŋomi sêndöc andu dan, ma sêndac iŋ pi yom dinaŋ ŋahu. ¹¹Ma iŋ sôm, “Ŋgac naŋ hu iŋ ndê awê siŋ ma gêm awê wakuc, naŋ kôm gêŋ mockaiŋ-ŋga têtŋ iŋ yêc Anötö aŋgô-ŋga. ¹²Ma awê naŋ hu nakweŋ siŋ ma gêm ngac wakuc, naŋ kôm gêŋ mockaiŋ-ŋga bocdinaŋ.”

Yisu gêm mbec balêkoc
(*Mat 19:13-15; Luk 18:15-17*)

¹³Têtŋ bêc dan lau sêhoŋ si balêkoc sêtêtŋ Yisu si, bu iŋ kêtŋ amba sac ŋac. Magoc iŋ ndê ngac-sêŋomi sêsôm dinda ti dambai. ¹⁴Têtŋ têtŋ Yisu gêlic gêtŋ dau iŋ tac ŋandê, ma sôm têtŋ ŋac, “Atec balêkoc dinaŋ sêtêtŋ aö sêmeŋ. Alhac ŋac ahuc dom, bu Anötö ndê gôliŋ gic lau naŋ sêtôm balêkoc sauŋ dindec, naŋ ŋawaê. ¹⁵Aö wasôm yomandô têtŋ mac bu asa naŋ bu sôc Anötö ndê gôliŋ ŋapu gitôm balêkoc sauŋ dan dom, naŋ oc nditôm dom bu sôc ndi.” ¹⁶Goc iŋ kôc balêkoc dau sa ma kêgape ŋac. Ma iŋ kêtŋ amba sac ŋac, ma gêm mbec ŋac.

Ŋgac ti lêlôm
(*Mat 19:16-22; Luk 18:18-23*)

¹⁷Yisu ti ma kêsêlêtŋ mbo seŋ whiŋ ndê ngacsêŋomi. Ma ŋgac dan kêtŋ meŋ ma pôtŋ haduc yêc iŋ aŋgô-ŋga, ma ndac iŋ bocdec bu, “K êdôhônŋwaga ŋayham, aö wakôm bocke dec tijambu Anötö oc kôc aö sa wandöc taŋli ŋapaŋ.” ¹⁸Goc Yisu sôm têtŋ iŋ, “Tu sake-ŋga am sam aö bu ŋayham? Anötö tigeŋ iŋ ŋayham. ¹⁹Am kêyalê yomsu naŋ Anötö kêtŋ têtŋ Moses, ‘*Ndic ŋamalac ndu dom. Kôm gêŋ mockaiŋ-ŋga dom. Nem kaŋ gêŋ dom. Sôm yom tasan pi lau dom. Êmsau lau bu kôc ŋac si gêŋ dom,*’ ma ‘*Toc damam lu dinam sa.*’” ²⁰Ma iŋ sôm, “Kêdôhônŋ-waga, aö kakuc yomsu hoŋ dinaŋ, têtŋ ndoc aö gambo balê ŋapaŋ e kwahic dec.” ²¹Yisu tahê iŋ ma tac whiŋ iŋ kêlêc. Ma iŋ sôm, “Gêŋ tigeŋ yêc tu am kôm-ŋga. Am ndi, kêtŋ am nem gêŋ hoŋ têtŋ lau sênemlhi, ma kêtŋ ŋa-awa têtŋ lau ŋalôm sawa. Ma bocdinaŋ am nem awa ŋandô oc yêc undambê. Ma tijambu am mweŋ ma êmkuc aö.” ²²Magoc têtŋ têtŋ ŋgac dau ŋgô Yisu ndê yom dinaŋ iŋ wec, ma kôlhö ti ŋalôm ŋawapac gi. Ŋahu bu iŋ ŋgac ti lêlôm.

Puc pi awa ti wapa
(*Mat 19:23-30; Luk 18:24-30*)

²³Goc Yisu tahê lau hoŋ, ma sôm têtŋ iŋ ndê ngacsêŋomi, “Lau ti lêlôm si awa ti wapa kalhac ŋac ahuc e gitôm dom bu sêsôc Anötö ndê gôliŋ ŋapu ŋagahô.” ²⁴Ŋac sêŋgô iŋ ndê yom dinaŋ e sêhêdaê. Ma Yisu sôm têtŋ ŋac tiyham, “O aneŋ balêkoc atac whiŋ-ŋga, ŋamalac bu sêsôc Anötö ndê gôliŋ ŋapu, naŋ gêŋ sauŋ dom. ²⁵Bôc atu dan gitôm kamel, oc tôm bu sôc so ŋalasê ŋagahô, hêc gêlêc ŋgac ti lêlôm dan bu sôc Anötö ndê gôliŋ

napu.”²⁶ Yisu ndê ngac-sêŋomi sêŋgô yom dinaŋ ma sêhêdaê ŋandô. Ma sêsôm têt dandi, “Bu bocdinaŋ dec asa oc tòm bu tap Anötö ndê mwasin nem lau si-ŋga sa? Oc ŋawapac atu!”²⁷ Yisu tahê ŋac ma sôm, “Gêŋ naŋ ŋamalac sêtôm dom bu sêkôm, naŋ Anötö gitôm bu kôm, bu Anötö gitôm bu kôm gêŋ hoŋ.”

²⁸ Goc Pita sôm têt iŋ, “Yac oc bocke? Yac ahu gêŋ hoŋ siŋ tu aŋkuc am-ŋga.”²⁹ Ma Yisu ô yom ma sôm, “Aö wasôm yomandô têt mac. Asa naŋ bu hu andu, me asidôwai, me lhuwêi, me dinda lu damba, me balêkoc, me nom siŋ tu aö-ŋga ma tu gweleŋ ŋawaê ŋayham-ŋga,³⁰ naŋ Anötö oc kêŋ gêŋ kaiŋ dinaŋ daêsam têt iŋ ô, têt ndoc iŋ mbo nom. Ma iŋ oc tap kisa ti ŋawapac sa tu aö-ŋga whiŋ. Ma têt têt ŋambu-ŋga, Anötö oc kôc iŋ sa, ma kêŋ iŋ ndöc tali ŋapaŋ yêc undambê.³¹ Tigerŋ lau daêsam naŋ kwahic dec sêti lau ŋamata-ŋga, naŋ oc sêti lau ŋambu-ŋga, ma lau ŋambu-ŋga oc sêti lau ŋamata-ŋga.”

Yisu sôm tiyham bu iŋ oc mbac ndu

(Mat 20:17-19; Luk 18:31-34)

³² Yisu wê iŋ ndê ngacsêŋomi ma sêŋsêlêŋ sêmbô seŋ bu sêtêŋ Jerusalem sêndi. Iŋ ndê ngac-sêŋomi sêŋsêlêŋ ti sêhêdaê, ma lau ŋatô naŋ sêŋsêlêŋ sêwhiŋ ŋac, naŋ sêtöc dau.^e Bocdinaŋ Yisu kôc ngacsêŋomi 12 sêsa si sêlhac dau-ŋga, ma sôm yom tiyham pi gêŋ naŋ oc hóc asê iŋ.³³ Iŋ sôm, “Kwahic dec yac bu dapi malac Jerusalem dandi, ma ŋac daŋ oc hoc ŋamalac ndê Atu asê ma kêŋ iŋ sip dabuŋsiga atu-tu ti kêdôhôn-waga yomsu-ŋga amba. ŋac oc sêkic yom bu sêndic iŋ ndu, ma sêkêŋ iŋ sip lau Rom-ŋga amba.³⁴ ŋac oc sêsu iŋ susu, sêhê gasôp pi iŋ, sêndic iŋ ŋamlic ŋandê ma sêndic iŋ ndu. Magoc tiŋambu bêc tö niŋga su, goc iŋ oc tisa tiyham.”

Jems lu Jon bu sêhóc gêlêc ngacsêŋomi ŋatô

(Mat 20:20-28)

³⁵ Jems lu Jon, Sebedi ndê atuŋgac lu, sêtêŋ Yisu si ma sêsôm, “Kêdôhônwaga, alu atac whiŋ gêŋ daŋ, ma bu andac am bu kôm gêŋ dau ŋandô sa.”³⁶ Goc Yisu ndac, “Amlu atac whiŋ bu aö wakôm sake?”³⁷ Ma sêsôm, “Alu atac whiŋ bu têt ndoc am ndöc nem pôn kiŋ-ŋga ti ŋawasi atu, naŋ am kêŋ alu andöc awhiŋ am, daŋ ndöc amam andô-ŋga ma daŋ ndöc gasê-ŋga.”³⁸ Magoc Yisu ô yom ma sôm, “Amlu aŋyalê gêŋ naŋ amlu andac, naŋ dom. Amlu atôm bu anôm gêŋ sip laclhu ŋawapac-ŋga naŋ aö wanôm, a? Ma atôm bu aliŋ saŋgu^f naŋ aö oc waliŋ, a?”³⁹ Ma iŋlu

^e 10:32 Lau naŋ sêŋkuc Yisu naŋ sêhêdaê ti sêtöc dau, ŋahu bu ŋac gauc gêm yom naŋ Yisu sôm têt ŋac su, pi gêŋ naŋ oc hóc asê iŋ têt têt iŋ bu pi Jerusalem ndi. Alic Mak 8:31 ma 9:30. ^f 10:38 Yisu ndê yom pi laclhu naŋ iŋ oc nôm, ma saŋgu naŋ iŋ oc liŋ, naŋ ŋahu sip ŋawapac daêsam naŋ oc hóc asê iŋ.

sêsôm, “Aêc, alu atôm.” Goc Yisu sôm, “Yomandô! Amlu oc anôm gêŋ sip laclhu tôm aô wanôm, ma aliŋ saŋgu tôm naŋ aô waliŋ. ⁴⁰Magoc aô dec oc waŋyaliŋ lau sa bu sêndöc aô amaŋ andô-ŋga ti amaŋ gasê-ŋga, naŋ dom. Anötö ti ŋadau bu êŋyaliŋ lau sa bu sêndöc dinaŋ.”

⁴¹Têŋ ndoc ŋgacsêŋomi 10 sêŋgô yom dau ŋawaê, naŋ ŋac tac ŋandê têŋ Jems lu Jon. ⁴²Goc Yisu mbwêc ŋac sêtêŋ iŋ si, ma sôm, “Mac aŋyalê bu lau sambuc si gôliŋwaga sêtoc dau sa têŋ ŋac si lau, ma ŋac si lau bata sêŋgwiniŋ lau naŋ sêmbo ŋac ŋapu. ⁴³Tigeŋ mac aŋkuc ŋac si mêtê dau dom. Mba! Mac nem asa bu ti ŋamalac tiwaê yêc Anötö aŋgô-ŋga, naŋ nem akiŋ mac. ⁴⁴Aêc! Asa bu ti mac nem ŋamalac ŋamata-ŋga, naŋ êŋgwiniŋ dau ma ti mac hoŋ nem ŋgac akiŋ ŋambwa. ⁴⁵Ŋahu bu lêŋ dau ti aneŋ lêŋ. Ŋamalac ndê Atu meŋ tu bu lau sênem akiŋ iŋ-ŋga dom. Mba. Iŋ meŋ bu nem akiŋ lau, ma bu kêŋ dau ti da bu nemlhi lau daêsam si sac ŋatôp.”

Yisu kôm ŋac tapec Batimeas ŋayham sa

(*Mat 20:29-34; Luk 18:35-43*)

⁴⁶Yisu ti ndê ŋgacsêŋomi sêŋsêlêŋ e sêhêc asê malac Jeriko, ma lau toŋ atu sêŋkuc ŋac. Têŋ ndoc ŋac bu sêhu Jeriko siŋ, naŋ sêtap ŋgac tapec daŋ sa, naŋ ndöc seŋ ŋamakê ma teŋ gêŋ. Iŋ Batimeas, ŋgac daŋ ŋaê Timeas ndê atungac. ⁴⁷Têŋ têm iŋ ŋgô bu Yisu Nasaret-ŋga kêsêlêŋ mbo seŋ, naŋ gic hu mbwêc yom asê bocdec bu, “Yisu, †Dawid ndê Atu, tamwalô aô!” ⁴⁸Goc lau daêsam sêhec yom iŋ ma sêsôm bu iŋ nem dôŋ. Magoc iŋ mbwêc ti ŋaŋga, “Dawid ndê Atu, tamwalô aô.” ⁴⁹Yisu ŋgô ŋac si yom ma kwê dôŋ kalhac, goc sôm têŋ lau, “Mac asôm têŋ iŋ bu meŋ.” Goc sêta yom têŋ ŋgac tapec dau ma sêsôm, “Tisa ti atac ŋayham! Iŋ ta am bu mweŋ.” ⁵⁰Goc ŋgac dau kac ndê ŋakwê andô-ŋga baliŋ su yêc nom, ma tisa ŋagahô ma têŋ Yisu gi. ⁵¹Ma Yisu ndac iŋ, “Am tac whiŋ bu aô wakôm sake têŋ am?” Ma ŋgac tapec dau sôm, “Kêdôhôn-waga, aô tac whiŋ bu tanôn ŋayham sa.” ⁵²Goc Yisu sôm, “Am ndi! Am nem kêŋ whiŋ aô dec kôm am ŋayham sa.” Ma ŋagahô iŋ tandô ŋawa sa, ma iŋ kêkuc Yisu mbo seŋ.

Yisu sôc Jerusalem gi

(*Mat 21:1-9; Luk 19:28-40; Jon 12:12-15*)

11 ¹Yisu ti ndê sêŋomi sêŋsêlêŋ sêhêganônŋ Jerusalem e sêsuŋ sa malac Betani ma malac Betpagi yêc Lôc Olib. Goc Yisu kêkiŋ ndê ŋgacsêŋom lu, ²ma sôm têŋ iŋlu, “Asôc malac dindê andi, ma yêc dindê amlu oc atap doŋki daŋ sa, naŋ sêsô dôŋ kalhac. Iŋ doŋki ŋatu wakuc, naŋ ŋamalac daŋ ndöc ŋahô muŋ su dom. Aŋgapwêc su ma akôc sa ameŋ. ³Ma lau bu sêndac amlu bu bocke ma amlu aŋgapwêc doŋki dau, naŋ asôm têŋ ŋac bu, ‘Pômduu tac whiŋ bu doŋki dindêc nem iŋ sa ŋasawa sauŋ, goc iŋ oc kêŋ mbu meŋ.’”

⁴Bocdinaŋ dec iŋlu sêsoċ malac dau si ma sêtap doŋki daŋ sa, naŋ lau sêsoċ dôn kalhac seŋ ŋadali k êpiŋ andu daŋ. Iŋlu bu sêŋgapwêc su, ⁵ma lau ŋatô naŋ sêlhac sêmpin, naŋ sêndac iŋlu, “Amlu akôm sake, dec bu aŋgapwêc doŋki dau su?” ⁶Ma iŋlu sêdo ŋac si yom tôm Yisu sôm têt iŋlu, dec sêhu doŋki dau siŋ têt iŋlu. ⁷Sêwê iŋ sa sêtêt Yisu si, ma sêhu si ŋakwê awê-ŋga sac doŋki, goc Yisu pi gi ndôc ŋahô. ⁸Ma lau daêsam sêhê si ŋakwê yêc seŋ. Ma lau ŋatô sêhêako a ŋalaun yêc seŋ ŋamakê ma sêkêt yêc seŋ. ⁹Lau naŋ sêmuŋ Yisu ti lau naŋ sêŋkuc iŋ, naŋ sêmbwêc “Hosana! Anötö nem mbec ŋgac naŋ meŋ gêm Pômdau aŋgô. ¹⁰Anötö nem mbec iŋ naŋ meŋ bu puc abaŋ Dawid ndê gôliŋ dôn. Hosana têt Anötö lôlôc-ŋga.”

¹¹Yisu hôc asê Jerusalem, goc soċ lôm dabuŋ ŋabatêmdö gi, ma gêlic gêt sambob naŋ yêc dindê. Magoc ac gi su dec iŋ ti ndê ŋgacsêŋomi 12 sêmbu sêsa malac Betani si bu sêyêc dindê.

Yisu pucbo a kiŋ daŋ

(Mat 21:18-19)

¹²Têt bêbêc Yisu ti ndê ŋgac-s êŋomi sêhu Betani siŋ ma sêŋsêlêt sêmbu seŋ, ma gêt yô Yisu. ¹³Iŋ gêlic a kiŋ daŋ naŋ kalhac ahê, goc têt a dau gi. Têm dinaŋ iŋ têt naŋ a kiŋ sem ŋandô dom, magoc Yisu gêlic bu a dinaŋ ŋalaun kêsôlô su dec kêt bata bu mboe kiŋ ŋandô oc sêŋgalêt. Magoc ŋandô mbasi, iŋ tap ŋalaun ŋambwa sa. ¹⁴Goc iŋ pucbo a dau ma sôm, “Lau daŋ oc sêneŋ ŋandô yêc a dindec tiyham dom.” Ma iŋ ndê ŋgacsêŋomi sêŋgô yom dau.

Yisu soc lau su yêc lôm dabuŋ

(Mat 21:12-17; Luk 19:45-46)

¹⁵Yisu ti ndê sêŋomi sêŋsêlêt si e sêhêc asê Jerusalem, ma sêtêt lôm dabuŋ si. Yêc lôm dabuŋ ŋabatêmdö lau sêtidulu gêt ti semlhi gêt sêmbu, ma Yisu gic hu soc ŋac sêsa awê. Iŋ kac lau sêdo mone-ŋga si tebo sa, ma kac lau naŋ sêyob balusi bu lau sênemlhi,[§] naŋ si pôn sa whiŋ. ¹⁶Ma iŋ gic yao lau bu sêkôc wapa sêtidulu-ŋga soċ lôm dabuŋ ŋagameŋ tiyham dom. ¹⁷Ma iŋ kêdôhôn lau ma sôm, “Sêto Anötö ndê yom yêc bocdec bu, ‘Aô neŋ andu gic waê bu lau akêt gameŋ hoŋ sêteŋ mbec sêmbu-ŋga.’ Mac aŋyalê yom dau, ma bocke dec mac akôm Anötö ndê andu ti lau kaŋ si gameŋ?”

¹⁸Tiŋambu dabuŋsiga atu-tu ma lau naŋ sêndôhôn yomso, naŋ sêŋgô ŋawaê pi gêt naŋ Yisu kôm, ma sêŋyalê bu lau sambob sêhêdaê tu iŋ ndê yom-ŋga. Tu dinaŋ-ŋga dec sêtöc Yisu, ma sêŋsalê lêt bu sêndic iŋ ndu. ¹⁹Yisu ti ndê ŋgac-sêŋomi sêmbu Jerusalem e ac gi sip, dec sêmbu sêsa si.

§ 11:15 Alic yom ŋapu-ŋga (footnote) yêc Mat 21:12.

Yom pi lêtj dakêtj whiŋ ti dateŋ mbec-ŋga
(*Mat 21:20-22*)

²⁰Ŋagalajŋsê bêbêc Yisu ti ndê ŋgacsêŋomi sêŋsêlêŋ bu sêmbu sêtêŋ Jerusalem sêndi, ma sêhêc asê a kiŋ naŋ Yisu pucbo. Ŋac sêlic bu a dau mbac, ŋasaŋgac ti ŋawakac hoŋ tibasô. ²¹Ma Pita gauc gêm Yisu ndê yom, dec sôm têtj iŋ, “Kêdôhônŋwaga, lic a kiŋ naŋ am pucbo, naŋ mbac su.” ²²Goc Yisu ô yom ma sôm têtj ŋac, “Akêtj whiŋ Anötö. ²³Aô wasôm yomandô têtj mac, bu asa naŋ bu sôm têtj lôc daŋ bu, ‘Puc daôm sa ma sip gwêc ŋalôm ndi,’ ma atac lu-lu dom magoc kêtj whiŋ bu Anötö oc kôm yom dau ŋandô sa, dec gêtj dau oc ŋandô sa. ²⁴Boc-dinaŋ aô bu wasôm têtj mac bu gêtj bocke naŋ mac bu atêŋ Anötö bu kêtj têtj mac, naŋ akêtj whiŋ bu mac akêc su, ma aô wasôm yom ŋandô, iŋ oc kêtj têtj mac. ²⁵⁻²⁶Ma têtj ndoc mac bu atêŋ mbec, ma bu gauc nem lau naŋ sêkôm sac têtj mac, naŋ goc asuc ŋac si sac kwi. Ma mac nem Damam naŋ mbo undambê, oc suc mac nem sac kwi bocdinaŋ.”

Gêndac pi Yisu ndê ŋaclai ŋahu
(*Mat 21:23-27; Luk 20:1-8*)

²⁷Yisu ti iŋ ndê ŋgacsêŋomi sêhêc asê malac Jerusalem tiyham ma sêtêŋ lôm dabuŋ si. Yisu kêsêlêŋ mbo lôm dabuŋ ŋabatêm-ndô, ma dabuŋsiga atu-tu ti kêdôhônŋwaga yomsu-ŋga ma lau bata sêtigasuc iŋ. ²⁸Ma sêndac iŋ, “Am kêc ŋaclai yêc nde, bu kôm gêtj hoŋ naŋ am kôm? Asa kêtj têtj am?” ²⁹Goc Yisu sôm têtj ŋac, “Gêtj ŋamata-ŋga aô wakêtj gêndac daŋ têtj mac. Mac bu aô aneŋ yom, dec wasôm aneŋ ŋaclai ŋahu asê têtj mac. ³⁰Asa kêtj ŋaclai têtj Jon dec iŋ kêku lau? Anötö kêtj ŋaclai têtj iŋ, me mba? Asôm têtj aô.”

³¹Ŋac sem yomgalôm pi Yisu ndê gêndac, ma sêsôm têtj dau, “Yac bu dasôm bu Anötö kêtj ŋaclai têtj Jon, goc Yisu oc ndac yac, ‘Tu sake-ŋga mac akêtj whiŋ Jon dom?’ ³²Magoc yac bu dasôm bu Jon kêku lau kêkuc ŋamalac nom-ŋga si gauc ŋambwa, goc lau oc sêlic yac sac.” Ŋac sêŋyalê bu lau daêsam sêlic Jon bu propet daŋ, dec sêtöc dau. ³³Bocdinaŋ sêsôm têtj Yisu, “Yac aŋyalê dom.” Ma iŋ sôm têtj ŋac, “Bocdinaŋ aô wasôm aneŋ ŋaclai ŋahu asê têtj mac dom.”

Yom gôliŋ pi lau sêyob ôm wain-ŋga
(*Mat 21:33-46; Luk 20:9-19*)

12 ¹Ma iŋ gic hu yom gôliŋ daŋ ma sôm têtj lau bata Israel-ŋga dinaŋ, “Ŋgac daŋ sô ôm wain-ŋga daŋ. Iŋ sô tuŋ sa, kêmasaŋ gameŋ tu lau sêmasaŋ wain ŋakwi-ŋga, ma kwê andu baliŋ daŋ bu lau sêlhac ma sêtip lau kaŋ. Tiŋambu iŋ kêtj ôm dau têtj lau ŋatô sêyob, ma kôlhö gi mbo gameŋ daŋ. ²Têtj têtj sêndic wain ŋandô sa-ŋga, naŋ ŋadau kêkiŋ ŋgac

akinj danj tɛŋ lau sɛyob ɔm-ŋga, tu bu sɛkɛŋ wain ŋandɔ ŋatɔ tɛŋ ij. ³Tigeŋ ŋac sɛlɔ ij dɔŋ, sic ij ŋamlic ŋandɛ, ma sɛkɛŋ ij kɔlhɔ amba sawa gi. ⁴Goc ŋadau kɛkinj ŋgac akinj danj tiyham, tigeŋ ŋac sic ij pi ŋagɔlɔŋ, ma sɛkɔm mɛtɛ sac tɛŋ ij. ⁵Tiŋambu ŋadau kɛkinj ŋgac titɔ-ŋga, magoc ŋac sic ij ndu. Ma ij kɛkinj lau daɛsam tiyham, ma ŋac sic ŋatɔ ŋamlic ŋandɛ, ma sic ŋatɔ ndu. ⁶Tiŋambu ŋgac tigeŋ mbo, naŋ ŋadau ndɛ atuŋgac, naŋ ij tac whiŋ ndu andɔ. Goc ŋadau kɛkinj ndɛ atu dau tɛŋ ŋac gi, ma gauc gɛm tɛŋ dau, ‘Lau naŋ sɛyob aneŋ ɔm, naŋ oc sɛtoc aneŋ atuŋgac dindec sa.’ ⁷Tigeŋ tɛŋ tɛm ŋadau ndɛ atu hɔc asɛ, naŋ lau sɛyob ɔm-ŋga sɛsɔm tɛŋ dau, ‘Ŋgac dinaŋ ij ŋadau ndɛ atuŋgac naŋ oc wɛkaiŋ ɔm dindec ti ndɛ gɛŋ lɛŋsɛm. Bocdinaŋ dandic ij ndu ma dakɔc ɔm dindec su ti yac neŋ.’ ⁸Ma sɛkɔc atuŋgac, sic ij ndu ma sɛtuc ij sa awɛ gi.”

⁹Goc Yisu ndac, “Mac gauc gɛm bu ɔm ŋadau oc kɔm sake tɛŋ lau naŋ sɛyob ij ndɛ ɔm? Iŋ oc meŋ ma ndic ŋac ndu, ma kɛŋ ɔm dau tɛŋ lau ŋatɔ sɛyob. ¹⁰Gauc nem yom naŋ sɛto yɛc bocdec bu, ‘*Hoc naŋ lau sɛkwɛ andu-ŋga sɛtec, naŋ kwahic ti hoc ŋamata-ŋga yɛc andu dau.*’ ¹¹*Pɔmdau kɔm gɛŋ dau, ma yac alic ŋayham.*’ Mac asam yom dau su, me?”

¹²Tɛŋ dinaŋ lau bata Israel-ŋga sɛŋyalɛ bu Yisu sɔm yom gɔliŋ dau hɛganɔŋ ŋac, dec sɛŋsalɛ lɛŋ bu sɛkɔc ij dɔŋ. Magoc sɛtɔc lau toŋ atu naŋ sɛmbo sɛwhiŋ Yisu, ma tu dinaŋ-ŋga sɛhu ij siŋ ma sɛlhɔ si.

Lau bu sɛtim Yisu pi yom takis-ŋga

(*Mat 22:15-22; Luk 20:20-26*)

¹³Tiŋambu lau bata dinaŋ sɛŋsalɛ lɛŋ bu sɛtim Yisu bu sɔm yom so danj. Ŋac sɛŋkiŋ lau Palɛsai ŋatɔ sɛwhiŋ lau Israel-ŋga ŋatɔ naŋ sɛpuc Herod ma lau Rom-ŋga si gɔliŋ dɔŋ, naŋ sɛtɛŋ Yisu si. ¹⁴Ŋac sɛhɔc asɛ ij ma sɛsɔm, “Kɛdɔhɔŋ-waga, yac aŋyalɛ bu am ŋgac sɔm yom ŋandɔ-ŋga. Am gauc gɛm lau si waɛ dom, ma toc ŋac hoŋ sa ŋalɛŋ tigeŋ. Ma am kɛdɔhɔŋ Anɔtɔ ndɛ lɛŋ tɛŋ lau kɛkuc yom ŋandɔ solop. Kwahic dec yac bu andac am bu ij solop bu yac dakɛŋ takis t ɛŋ †Sisa, me mba? Yac oc danemlhi takis, me mba?”

¹⁵Yisu ŋgɔ yom dau, tigeŋ ij kɛyalɛ bu ŋac gauc gɛm bu sɛtim ij, dec sɔm, “Tu sake-ŋga mac bu atim aɔ? Akɔc mone silba danj ma atɔc tɛŋ aɔ.” ¹⁶Goc sɛkɛŋ mone danj tɛŋ ij, ma ij ndac ŋac, “Asa ndɛ ŋagatu ti ŋaɛ yɛc mone dindec?” Ma sɛɔ yom ma sɛsɔm, “Sisa ndɛ.” ¹⁷Dec Yisu sɔm, “Bocdinaŋ atoc Sisa sa ŋa gɛŋ naŋ gic ij ŋawaɛ, ma atoc Anɔtɔ sa ŋa gɛŋ naŋ gic ij ŋawaɛ.” Ŋac sɛŋgɔ Yisu ndɛ yom dau, ma sɛhɛdaɛ tu ij ndɛ gauc-ŋga.

Lau Sadiusi bu sɛtim Yisu pi yom datisa akɛŋ lau batɛ-ŋga

(*Mat 22:23-33; Luk 20:27-38*)

¹⁸Ma lau †Sadiusi ŋatɔ sɛtɛŋ Yisu si, bu sɛkɛŋ gɛndac danj tɛŋ ij. Ŋac lau Israel si toŋ danj, naŋ sɛkɛŋ whiŋ dom bu lau batɛ oc sɛtisa tiyham.

¹⁹Ma ñac sêndac iñ bocdec bu, “Kêdôhônŵaga, Moses to yac neñ yomsu dañ bocdec bu. Ñgac dañ bu ndê dôwa nem awhê sa ma bu mbac ndu ma balêkoc mbasi, nañ ñgac dau oc nem dôwa ndê awhê sawa, ma kwê balêkoc asê tu dôwa-ñga. ²⁰Têñ ndoc dañ asidôwai 7 sêmbo. Ñgac ñamata-ñga gêm awhê sa, magoc mbac ndu, ma balêkoc mba. ²¹Goc iñ asi, ñgac tilu-ñga, gêm awhê sawa dau, magoc mbac ndu ma balêkoc mba. Ñgac titô-ñga bocdinañ, ²²ma asidôwa hale bocdinañ, hoñ sem awhê sawa dau sa, magoc sêmbac ndu, ma balêkoc mba. Ma tiñambu awhê dau mbac ndu. ²³Kwahic dec yac bu andac am bocdec bu. Lau batê bu sêtisa tòm lau ñatô sêsôm, dec awhê dau oc ti asidôwa asa ndê awhê? Bu asidôwai 7 dinañ hoñ sem awhê tigeñ dinañ su têtñ ndoc sêmbo tali.”^h

²⁴Ma Yisu sôm têtñ ñac, “Mac akôc gauc so, bu mac aňyalê Anötö ndê yom ti iñ ndê ñaclai dom. ²⁵Têtñ têtñ lau batê sêtisa, nañ lau oc sênem dau dom. Ñac oc sêmbo sêtôm aňela undambê-ñga. ²⁶Ma yom dañ tiyham têt asê bu lau batê oc sêtisa. Mac asam su yêc Moses ndê buku. Têtñ ndoc Moses gêlic ya golom a dañ, nañ Anötö sôm têtñ iñ bu, ‘*Åð Abraham ndê Anötö, Aisak ndê Anötö ma Jakob ndê Anötö.*’ ²⁷Lau batê bu sêtisa dom, dec tu sake-ñga Anötö sam dau bu lau têt dinañ si Anötö? Iñ lau batê si Anötö dom, iñ lau tali si Anötö. Mac nem gauc iñ so sambuc.”

Yomsu ñamata-ñga
(*Mat 22:34-40; Luk 10:25-28*)

²⁸Kêdôhônŵaga yomsu-ñga dañ kalhac whiñ lau nañ sêkêñ dañga Yisu ma lau Sadiusi si yom, ma iñ gêlic bu Yisu ô lau Sadiusi si yom ñapep. Bocdinañ iñ ndac Yisu, “Anötö ndê yomsu bocke ti yomsu ñamata-ñga?” ²⁹Ma Yisu sôm, “Yomsu ñamata-ñga nañ hôt gêlêc yomsu hoñ nañ bocdec, ‘*Mac lau Israel-ñga aňgô! Pômdau yac neñ Anötö iñ Pômdau tigeñ.* ³⁰*Atac whiñ Pômdau am nem Anötö ti am nem ñalôm sambuc, ti gatôm sambuc, ti gauc sambuc, ma ti licwalô sambuc.*’ ³¹Ma yomsu tilu-ñga bocdec yêc, ‘*Atac whiñ lau meñpañ am-ñga, tòm am atac whiñ am daôm.*’ Yomsu lu dinañ sêhôt gêlêc yomsu hoñ su.”

³²Goc kêdôhônŵaga yomsu-ñga dau sôm têtñ Yisu, “Kêdôhônŵaga, am sôm solop. Yomandô, Anötö tigeñ mbo, ma anötö ñandô dañ mbo dom. ³³Ma yac bu atac whiñ A nôtö ti neñ ñalôm sambuc, ti gauc sambuc, ma ti licwalô sambuc, ma yac bu atac whiñ lau meñpañ yac-ñga tòm yac atac whiñ yac dauñ, nañ hôt gêlêc bu yac dakêñ wata ti da pi ya ndi, me bu dakêñ gêtñ ñatô ti da.” ³⁴Yisu gêlic bu ñgac dau ô yom ti gauc ñayham, dec sôm têtñ iñ, “Êmkuc gauc ñayham dinañ dec am oc tòm bu mbo Anötö ndê gôliñ ñalôm.”

^h **12:19-23** Lau Sadiusi gauc gêm bu ñac si gêndac dau têt asê bu lau batê oc sêtisa tiyham dom.

Yisu sôm yom dinarj, ma tiŋambu lau sêtöc bu sêkêŋ gêndac têtj iŋ tiyham.

Yisu kêsahê lau si gauc pi Mesaya

(Mat 22:41-46; Luk 20:41-44)

³⁵Yisu kêdôhônj lau mbo lôm dabuŋ ŋamakê, ma ndac ŋac, “Bocke ma lau †Skraib sêsam Mesaya bu Dawid ndê Atu? ³⁶Dawid dau hoc yom asê tôm ŋjalau Dabuŋ puc iŋ dôŋ, ma to yom pi Mesaya bocdec bu, ‘Anötö sôm têtj aneŋ Pômdau, “Am ndöc aö amanj andô-ŋga e nditôm aö wakêŋ nem ŋacyo sêsôc am gahim ŋapu.”’ ³⁷Dawid dau sam Mesaya bu iŋ ndê Pômdau, ma bocke dec lau sêsam iŋ bu Dawid ndê Atu?” Ma lau hoŋ sêŋgô Yisu ndê yom ti atac ŋayham atu.

Yisu ndê puc pi lau Skraib si mêtê sac

(Mat 23:1-7; Luk 20:45-47)

³⁸Ma Yisu kêdôhônj lau ma sôm, “Ayob daôm ŋapep bu aŋkuc lau Skraib si gêbôm dom. Ŋac sêsôc ŋakwê baliŋ ma sêŋsêlêŋ sêmbo malac lôm, bu ŋac atac whiŋ bu lau sêtöc ŋac sa ma sêhê mwalêc ŋac. ³⁹Ŋac atac whiŋ bu sêndöc mala ŋamata-ŋga yêc lôm wê-ŋga, ma sêndöc lau tiwaê si mala têtj ndoc sêneŋ mwasiŋ. ⁴⁰Yêc lau hoŋ aŋgô-ŋga lau dau sêteŋ mbec baliŋ. Magoc têtj ndoc lau sêlic ŋac dom, naŋ sêŋsau lauwhê sawa bu sêŋgaho ŋac si andu su. Anötö oc êmatôc ŋac, ma kêtj ŋagêyô sac sambuc têtj ŋac.”

Awhê tuc daŋ kêtj da danŋe

(Luk 21:1-4)

⁴¹Tiŋambu Yisu ndöc sic ndöc lôm dabuŋ ŋabatêmdö kêtj apa naŋ lau sêkêŋ si da sip-ŋga, ma tahê lau hoŋ naŋ sêkêŋ si da sip apa dau. Lau ti lêlôm daêsam sêkêŋ awa atu. ⁴²Tigeŋ awhê tuc ŋalôm sawa daŋ meŋ ma kêtj awa sauŋ lu gitôm wan toea lu sip apa da-ŋga. ⁴³Goc Yisu ta ndê ŋgac-sêŋomi sêmeŋ ma sôm, “Yomandö, aö wasôm têtj mac bu yêc Anötö aŋgô-ŋga awhê tuc ŋalôm sawa dindec kêtj da naŋ hóc gêlêc lau hoŋ si da su. ⁴⁴Ŋahu bu lau ti lêlôm hoŋ sêkêŋ si da, magoc ŋac si awa daêsam gacgeŋ yêc ŋac-ŋga. Magoc awhê dindec iŋ awhê ŋalôm sawa, ma iŋ kêtj ndê gêtj hoŋ ti da.”

Yisu sôm yom pi lôm dabuŋ Jerusalem-ŋga

(Mat 24:1-2; Luk 21:5-6)

13 ¹Têtj ndoc Yisu bu hu lôm dabuŋ ŋagameŋ siŋ, naŋ iŋ ndê ŋgacsêŋom daŋ sôm têtj iŋ, “Kêdôhônjwaga, lic hoc atu-tu ma andu ŋayham kêlêc naŋ sêkwê sa sêlhac dec.” ²Magoc Yisu ô yom ma sôm têtj iŋ, “Am lic andu atu-tu ti lôm dabuŋ dindec! Aö wasôm têtj am,

bu tiyambu ηacyo oc sêsenη hoc atu-tu hoη dindec su e hoc daη oc ndöc hoc daη ηahô tiyham dom.”

Gêη wapac têm ηambu-ηga-ηga
(*Mat 24:3-14; 10:17-22; Luk 21:7-19*)

³ηac sêsa sêtêη Lôc Olib si, ma tiyambu Pita, Jems, Jon ma Andru tawasê sêtêη Yisu si ma sêndöc anğô têtê lôm dabuη yêc malac Jerusalem. Ma ηac sêndac iη bocdec bu, ⁴“Sôm têtê yac bu ηawapac naη am sôm yom pi, naη oc hóc asê Jerusalem têtê têm bocke, ma gêη sake oc kêtê puc yac bu têm dau meη kêtêiη?” ⁵Goc Yisu sôm têtê ηac, “Ayob daôm ηapep bu lau daη sêηsau mac dom. ⁶Bu lau daêsam oc sêmeη sênem aö anğô ma sêsôm, ‘Aö Mesaya dauη dec,’ ma oc sêηsau lau daêsam. ⁷Ma têtê ndoc mac anğô ηawaê bu lau sic siη têtê dau me sêmasaη dau tu sêndic siη-ηga, naη asö dom. Bu gêη hoη dinaη gic waê bu meη sa, m agoc têm ηambu-ηga yêc dôn yêc. ⁸Kiη nom-ηga oc sêkêtê kisa dau, ma lau gameη daη oc sêndic siη têtê lau gameη daη. Tiyhó oc nem yêc gameη hoη, ma tóbôm oc sa. Gêη hoη dinaη oc ndic hu ηawapac têm ηambu-ηga-ηga, gitôm awhê naη kêsahê balêkoc tuη iη ma gêη dau gic hu ηandê atu naη iη oc hóc tu kóc balêkoc-ηga.

⁹⁻¹⁰“Gêη ηamata-ηga lau oc sêhoc ηawaê ηayham asê têtê lau sambob, ma têtê dinaη têm ηambu-ηga oc meη hóc asê. Ayob daôm ηapep. Lau oc sêwê mac atêtê lau sêmatóc yom-ηga andi, ma sêhi mac ηa sö yêc lôm wê-ηga. Tu aö-ηga dec lau oc sêkêtê mac alhac gôliηwaga ti kiη anğô-ηga, magoc ndoc dinaη ti têm bu mac ahoc yom ηandö asê têtê ηac. ¹¹Têtê têm naη sêkóc mac dôn ma sêwê mac atêtê lau sêmatóc mac-ηga andi, naη ahêgo daôm tu yom asôm-ηga dom. Asôm yom naη Anötö oc kêtê têtê mac têtê ndoc dinaη, bu mac daôm oc asôm yom dom, ηalau Dabuη oc sôm.

¹²“Têtê ndoc ηawapac-ηga dinaη, lau naη sêkêtê whiη dom oc sêhoc si asidôwai sêkêtê whiη aö-ηga asê bu sêndic ηac ndu, ma dambai oc sêkôm têtê atui boc-dinaη. Balêkoc oc sêli dau sa têtê damba ti dindai, ma sêkêtê ηac sêtêη lau bu sêndic ηac ndu. ¹³Lau hoη oc sêtec mac tu aö neη ηaê-ηga. Magoc asa naη bu lhac ηaηga ma hu aö siη dom e ndê têm pacndê, naη oc tap Anötö ndê mwasij nem iη si-ηga sa.”

ηawapac gameη Judia-ηga
(*Mat 24:15-28; Luk 21:20-24*)

¹⁴“Gêη sac sambuc naη oc kôm gameη tisac, naη lau oc sêkêtê lhac gameη naη gic iη ηawaê dom. (Asa naη sam yom dindec, naη kóc gauc ηapep, bu ηahu yêc siη dau.) Mac lau asa naη ambo gameη Judia-ηga ma alic gêη dau, naη hoη alhö api gameη lôc-ηga andi. ¹⁵Alhö ηagahô ma gauc nem mac nem gêη daη dom. Lau naη sêηwhaη dau sêndöc andu ηasactô, naη sêsóc andu ηalôm bu sêkóc si gêη daη tóhôn dom. ¹⁶Ma ηac

naŋ sêmbô ôm, naŋ bocdinaŋ. Sêkac dau kwi bu sêkôc si gêŋ ŋatô dom. 17Oyaê. Lauwhê tidaê, ma ŋac naŋ sêkêŋ su têŋ balêkoc, naŋ oc sêtap ŋawapac atu sa têŋ têm dinaŋ. 18Ateŋ mbec bu gêŋ dinaŋ tap mac sa têŋ ndoc uhô-ŋga dom. 19Ŋahu bu ŋawapac ŋandô naŋ bu sa têŋ têm dinaŋ, naŋ oc hôc gêlêc ŋawapac hoŋ naŋ sêhôt asê nom têŋ têm naŋ Anötô kêŋ undambê ti nom e kwahic dec, ma tiŋambu oc sa bocdinaŋ tiyham dom. 20Magoc Pômdau oc kêŋ ndoc dinaŋ tiapê tu bu nem lau naŋ iŋ kêyalin sa su, naŋ sa-ŋga. Bu mba, goc lau hoŋ oc sêniŋga.

21“Têŋ ndoc dinaŋ ŋgac daŋ bu sôm têŋ mac bu, ‘Alic, Mesaya dau dindec,’ me ‘Alic, Mesaya dau dindê,’ naŋ akêŋ whiŋ ŋac dom. 22Lau naŋ sêŋsau bu ŋac Mesaya, ma propet tasan oc sêmeŋ ma sêkôm gêŋ dalô ti gêŋ atu-tu bu sêŋsau lau. Ma ŋac oc sêŋsahê bu sêtim lau naŋ Anötô kêyalin ŋac sa, naŋ sêwhiŋ. 23Aô gakêŋ puc mac gwanan, ma bocdinaŋ ayob daôm ŋapep.”

Ŋamalac ndê Atu ndê bêc mbu meŋ-ŋga

(Mat 24:29-36; Luk 21:25-33)

24Ma Yisu sôm, “Ndoc ŋawapac-ŋga dinaŋ oc pacndê, ma tiŋambu lau oc sêlic gêŋ dalô atu-tu. Ac oc nem ganduc ma ayô oc ŋawê tiyham dom. 25Ma tata oc sêpeŋ akêŋ umboŋ, ma gêŋ ti ŋaclai naŋ sêlhac umboŋ oc wiwic sa. 26Ma tiŋambu lau oc sêlic Ŋamalac ndê Atu meŋ ndôc dao ŋahô ti ndê ŋaclai ma ŋawasi atu. 27Ma iŋ oc êŋkiŋ ndê aŋela sêsa sêtêŋ nom ŋabatij ti undambê ŋabatij hoŋ sêndi, bu sêndic lau naŋ iŋ kêyalin ŋac sa su, naŋ sa.

28“Gauc nem a laŋ. Têŋ ndoc mac alic ŋalaun wakuc bu lêc, naŋ mac aŋyalê bu ndoc ac-ŋga meŋ kêpiŋ. 29Ma bocdinaŋ têŋ ndoc mac alic gêŋ naŋ aô gasôm yom pi, naŋ hôc asê, dec aŋyalê bu Ŋamalac ndê Atu ndê bêc mbu meŋ-ŋga meŋ kêpiŋ su, gitôm iŋ meŋ kalhac gatam. 30Yomandô! Lau têm dinaŋ-ŋga oc sêniŋga dom e gêŋ hoŋ dinaŋ hôc asê. 31Undambê ti nom oc niŋga, magoc aneŋ yom oc niŋga dom. Gêŋ hoŋ oc ŋandô sa tôm aô gasôm.”

Lau daŋ sêŋyalê Yisu ndê bêc mbu meŋ-ŋga dom

(Mat 25:13-15)

32Ma Yisu sôm, “Lau daŋ sêŋyalê bêc me acgatu naŋ Ŋamalac ndê Atu oc mbu meŋ, naŋ dom. Aŋela undambê-ŋga sêŋyalê dom, Anötô ndê Atu kêyalê dom, Damaŋ tawasê kêyalê. 33Bocdinaŋ anem ali ma ayob daôm ŋapep! Mac am gauc têm naŋ bêc ŋambu-ŋga dau oc meŋ sa. 34Gitôm andu ŋadau daŋ naŋ bu sa ndi lic gameŋ ŋatô. Iŋ hu ndê andu siŋ ma kêŋ iŋ ndê lau akiŋ sêwêkaiŋ si gweleŋ têtêŋ. Ma iŋ oc sôm têŋ ŋgac yob gatam-ŋga, bu iŋ nem ali ma tatin gameŋ ŋapep e iŋ mbu meŋ. 35Bocdinaŋ anem ali, bu mac aŋyalê ndoc naŋ andu ŋadau oc mbu meŋ, naŋ dom. Iŋ oc hôc asê têŋ telha me timaniŋhu, me

dalec tañ, me bêbêc ganduc, nañ mac aňyalê dom. ³⁶Ayob daôm ñapep, mboe inñ oc mbu meñ ñagahô, ma tap mac sa ayêc bêc ayêc. ³⁷Yom nañ aô gasôm têt mac, nañ dec wasôm têt lau hoñ bocdinañ. Anem ali!”

Sêkic yom bu sêndic Yisu ndu

(Mat 26:1-5; Luk 22:1-2)

14 ¹Lau Israel si †Mwasinñ Pasowa ti †Mwasinñ Bolom Yist Mba-nga ñandoc meñ kêpinñ, ma bêc lu yêc dôn yêc. Ma dabuñ-siga atu-tu ti lau nañ sêndôhôn yomsu-nga sêñsalê lêt dañ bu sêkôc Yisu dôn gelec ma sêndic inñ ndu. ²Tigeñ sêhêgo dau ma sêsôm, “Dakôm têt Mwasinñ Pasowa-nga ñandoc dom, mboe lau daêsam nañ sêmbo Jerusalem tu om atu Pasowa-nga, nañ oc sêlic ma sêli dau sa.”

Awhê dañ gêm oso Yisu

(Mat 26:6-13; Luk 7:36-50; Jon 12:1-8)

³Têt têt dinañ Yisu mbo malac Betani, ma gêt gêt ndôc whinñ ñgac dañ ñaê Saimon. Muñ-nga inñ ñgac ti gêm bac leprasi. Yisu ndôc tebo ma awhê dañ meñ, nañ kôc bu ñamalu ñayham ñaôli atu sip kac dañ. Inñ kac gêt dau sa, ma kêc gêt malu dau pi Yisu ndê ñagôlôn. ⁴Lau ñatô sêlic dec tac ñandê têt awhê dau, ma sêsôm, “Tu sake-nga inñ kêyainñ gêt ñamalu dinañ? ⁵Gitôm bu dakêt têt lau sênemlhi ma datap awa atu sa, ma dakêt têt lau ñalôm sawa. ñaôli dau oc hôc gêlêc ñaôli tu gweleñ yala sambuc-nga su.” Ma sêhec yom inñ ñalêt sac.

⁶Magoc Yisu sôm, “Ahu inñ sinñ ma akêt ñawapac têt inñ dom. Inñ kôm gêt ñayham solop têt aô. ⁷Lau ñalôm sawa oc sêmbo sêwhinñ mac ñapañ, ma bocdinañ dec têt bocke mac bu atac whinñ, nañ oc tôm bu mac anem ñac sa. Tigeñ aô oc wambo wawhinñ mac ñapañ dom. ⁸Awhê dindec gitôm bu êmwasinñ aô ñalêt dinañ, dec kôm. Inñ kêc gêt ñamalu pi aô, dec tôm inñ kêmasañ aô neñ ñamlic gwanañ tu sêñsuhunñ aô-nga. ⁹Yomandô aô wasôm têt mac, bu tinjambu lau oc sêhoc ñawaê ñayham asê yêc gameñ hoñ, ma têt dinañ ñac oc sêsôm yom pi awhê dindec ma lau oc gauc nem inñ.”

Judas sôm tidôn bu hoc Yisu asê

(Mat 26:14-16; Luk 22:3-6)

¹⁰Têt ndoc dinañ Judas Iskeriot, ñgacsêñomi 12 si dañ, têt dabuñsiga atu-tu gi ma sôm bu inñ oc hoc Yisu asê têt ñac. ¹¹Ñac sêñgô inñ ndê yom ti atac ñayham, ma sêsôm tidôn bu sênemlhi inñ. Bocdinañ inñ kêsalê lêt tu bu hoc Yisu asê-nga.

Yisu ndê ñgacsêñomi sêmasañ Mwasinñ Pasowa-nga

(Mat 26:17-19; Luk 22:7-13)

¹²Têt Mwasinñ Bolom Yist Mba-nga ñabêc ñamata-nga, bêc nañ lau Israel-nga sic domba Pasowa-nga ndu, nañ ñgacsêñomi sêsôm têt Yisu bu,

“Am tac whiŋ bu yac amasaŋ Mwasinŋ Pasowa bu am neŋ whiŋ yac-ŋga yêc nde?” ¹³Dec Yisu kêkinŋ ndê ŋgacsêŋom lu ma sôm têtŋ iŋlu, “Asôc malac Jerusalem andi, ma amlu oc atap ŋgac daŋ sa naŋ kêbalaŋ bu lôn daŋ. Awhiŋ iŋ atêtŋ iŋ ndê ŋadau ndê andu andi. ¹⁴Ma asôm têtŋ andu ŋadau, ‘Alu mba kêdôhônŋwaga ndac am tu andu ŋalôm ŋaclenŋ-ŋga, bu iŋ ti ndê ŋgacsêŋomi bu sêneŋ Mwasinŋ Pasowa-ŋga yêc am nem andu.’ ¹⁵Ma iŋ oc tôc ŋalôm atu daŋ yêc andu dau ŋahô-ŋga têtŋ amlu. Tebo ti gêtŋ hoŋ tu yac daneŋ Mwasinŋ Pasowa-ŋga yêc ŋalôm dau, goc amasaŋ gêtŋ yêc dinaŋ.” ¹⁶Goc sêŋom lu dinaŋ sêsôc malac si, ma sêtap gêtŋ hoŋ sa tôm Yisu sôm su, ma sêmasaŋ Pasowa.

Yisu sôm asê bu ŋgac daŋ oc hoc iŋ asê

(Mat 26:20-25; Luk 22:21-23)

¹⁷Têtŋ ac gi su Yisu ti ŋgacsêŋomi 12 sêtêtŋ andu dau si. ¹⁸Ŋac sêndöc ti seŋ gêtŋ sêmbô, ma Yisu sôm, “Yomandô aô wasôm têtŋ mac, bu mac nem daŋ oc hoc aô asê. Ŋgac dau kwahic dec ndöc ma gêtŋ gêtŋ whiŋ aô.” ¹⁹Yom dau kôm ŋac sêsö, ma ŋalôm ŋawapac atu, ma ŋac tigenŋ-tigenŋ sêsôm têtŋ iŋ, “Mboe aô, a? Mba!” ²⁰Goc iŋ sôm têtŋ ŋac, “Ŋgac dau iŋ mac lau 12 nem daŋ, ma kwahic dec alu aŋ gêtŋ sip pele tigenŋ. ²¹Gêtŋ dau oc ŋandô sa pi Ŋamalac ndê Atu, tôm yom naŋ sêto yêc. Tigenŋ ŋgac naŋ hoc aô asê, naŋ oc tap ŋawapac atu sa, ma tu dinaŋ-ŋga iŋ dinda bu kôc iŋ dom, dec oc ŋayham.”

Yisu gic hu Mwasinŋ Dabuŋ

(Mat 26:26-29; Luk 22:15-20)

²²Têtŋ têtŋ ŋac seŋ gêtŋ sêmbô, naŋ Yisu kôc bolom, gêm mbec, pô kôc-kôc, ma gic sam têtŋ ŋac. Ma iŋ sôm, “Akôc sa loc, aô neŋ ŋandô dau dindéc.” ²³Ma iŋ kôc laclhu wain-ŋga daŋ ma gêm daŋge, goc kêŋ têtŋ ŋac ma ŋac hoŋ sênôm. ²⁴Iŋ sôm têtŋ ŋac, “Aô neŋ dac wamatiŋ pwac-ŋga dau dec, naŋ wakêc siŋ tu lau daêsam-ŋga. ²⁵Yomandô aô wasôm têtŋ mac bu aô oc wanôm wain tiyham dom e Damaŋ ndê gôliŋ meŋ sa tiawê, ma têtŋ ndoc dinaŋ aô wanôm tiyham.”

²⁶Tiŋambu ŋac sem wê daŋ, ma sêlhö sêsa sêtêtŋ Lôc Olib si.

Yisu sôm bu Pita oc sêc iŋ ahuc

(Mat 26:31-35; Luk 22:31-34)

²⁷Ma Yisu sôm têtŋ ŋac, “Mac hoŋ oc ahu aô siŋ, tôm yom naŋ sêto yêc bocdec bu, ‘Aô oc waseŋ ŋgac yob domba-ŋga, ma domba oc sêlhö babalip.’ ²⁸Magoc tiŋambu aô watisa tiyham, ma wamuŋ mac watêtŋ gameŋ Galili-ŋga wandi.” ²⁹Dec Pita sôm têtŋ iŋ, “Ŋac hoŋ bu sêhu am siŋ, tigenŋ aô wahu am siŋ dom.” ³⁰Ma Yisu ô yom ma sôm, “Aô wasôm yomandô bu ôbwêc dau dindéc am oc sêc aô ahuc tidim tö su, goc dalec oc taŋ tidim

lu-nga.” ³¹Tigen Pita sôm yom ti nanga, “Mba! Gitôm sêndic aö ndu wawhiŋ am, aö oc wasêc am ahuc dom.” Ma ŋac hoŋ sêsôm yom kaiŋ tigen.

Yisu teŋ mbec mbo ôm Getsemani

(Mat 26:36-46; Luk 22:39-46)

³²Ŋac sêsa si e sêhóc asê ôm †olib-nga daŋ, ôm naŋ sêsam bu Getsemani, ma Yisu sôm têt ndê ŋgacsêŋomi, “Andöc dec ma aö waterŋ mbec.” ³³Goc iŋ kôc Pita, Jems ma Jon sêwhiŋ iŋ si, ma sêhu ŋgacsêŋomi ŋatô siŋ. Têt ndoc dinaŋ Yisu ndê ŋalôm ŋawapac atu ma iŋ pô sim dau ŋandô. ³⁴Iŋ sôm têt ŋac, “Aö neŋ ŋalôm kêsahê ŋawapac atu, kêpiŋ bu oc wambac ndu. Mac andöc dec ma anem ali.” ³⁵Goc iŋ hu ŋac siŋ ma sa ŋasawa sauŋ gi. Iŋ hu dau sip nom gi ma teŋ mbec, bu nditôm goc Anötô nem iŋ sa bu êŋlêc têt hóc ŋandê-nga naŋ oc hóc asê iŋ. ³⁶Iŋ sôm, “Damaŋ, O Damaŋ, am gitôm bu kôm gêt hoŋ. Kôc laclu ŋawapac-ŋ ga dindéc su yêc aö. Magoc êmkuc aö neŋ atac whiŋ dom, kôm tôm am daôm nem atac whiŋ bu kôm.”

³⁷Iŋ teŋ mbec su, dec mbu gi ma tap sa bu ŋgacsêŋomi sêyêc bêc sêyêc. Goc iŋ uŋ ŋac sa ma sôm têt Pita, “Saimon, bocke dec am yêc bêc? Am gitôm dom bu nem ali tôm acgatu ŋasawa tigen, a? ³⁸A nem ali ma ateq mbec bu lêtôm tap mac sa dom. Mac nem gatôm licbalê, tigen ŋamlic kwapac.”

³⁹Goc Yisu sa gi, ma teŋ mbec tigen dinaŋ tiyham. ⁴⁰Pacndê, goc iŋ mbu gi ma gêlic ŋac sêyêc bêc, bu ŋac tandô hê ŋac sa ŋandô. Ma ŋac sêpônnda yom tu sêsôm têt iŋ-nga. ⁴¹Goc iŋ gi ma teŋ mbec tidim tô-nga. Ma têt ndoc iŋ mbu têt ŋac tiyham, naŋ iŋ sôm, “Tu sake-nga mac ayêc bêc ti aŋwhaŋ daôm ŋapaŋ? Gitôm! Ndoc meŋ hóc asê su bu sêhoc Ŋamalac ndê Atu asê ma sêkêŋ iŋ sip lau sac amba. ⁴²Atisa ma dandi! Alic ŋgac naŋ hoc aö asê dec meŋ su.”

Sêkôc Yisu dôŋ

(Mat 26:47-56; Luk 22:47-53; Jon 18:3-11)

⁴³Yisu sôm yom dinaŋ mbo, ma Judas, ŋgacsêŋomi 12 si daŋ hóc asê whiŋ lau daêsam naŋ sêhóc bieŋ ti síŋ. †Dabuŋsiga atu-tu ti kêdôhônŋwaga yomsu-nga ma lau bata sêŋkiŋ lau toŋ dinaŋ sêwhiŋ Judas sêmeŋ. ⁴⁴Judas kêŋ puc lau d au gwanaf su, ma sôm, “Ŋgac naŋ mac aŋsalê, naŋ aö oc waŋgutô iŋ bu watôc iŋ asê têt mac. Akôc iŋ dôŋ ma akêŋ lau sêyob iŋ, goc awê iŋ sa andi.” ⁴⁵Bocdinaŋ têt ndoc Judas hóc asê, naŋ iŋ têt Yisu solop gi ma sôm, “Kêdôhônŋwaga,” ma ŋgutô iŋ. ⁴⁶Dec lau naŋ sêwhiŋ Judas, naŋ sêkôc Yisu dôŋ. ⁴⁷Yisu ndê lau sêlhac sêmpin iŋ, ma ŋac si daŋ puc ndê bieŋ sa ma pa dabuŋsiga atu ndê ŋgac akiŋ ndê daŋgalauŋ daŋ su.

48 Goc Yisu sôm, “Bocke dec mac akôc bieŋ ti gêŋ siŋ-ŋga ma asa amen bu akôc aô dôŋ gitôm ŋgac kaŋ daŋ? 49 Tôm bêc hoŋ aô gambo gawhiŋ mac ma kadôhôn lau yêc lôm dabuŋ ŋabatêmdö, magoc mac akôc aô dôŋ dom. Tigeŋ gêŋ naŋ mac akôm kwahic dec, naŋ kôm Anötö ndê yom naŋ sêto yêc, naŋ ŋandö sa.”

50 Têŋ dinaŋ Yisu ndê lau hoŋ sêhu iŋ siŋ ma sêlhö si. 51 Ŋgac batac daŋ kêkuc Yisu ma mbo whiŋ iŋ ti ndê lau têŋ ôbwêc dinaŋ, ma iŋ puc po ŋambwa. Lau siŋ bu sêlô iŋ dôŋ, 52 tigeŋ iŋ hu ndê po siŋ yêc ŋac si amba, ma kölhö ŋamlic ŋambwa gi.

Lau bata Israel-ŋga sêmatôc Yisu

(Mat 26:57-68; Luk 22:54-55, 63-71; Jon 18:12, 13, 19-24)

53 Dabuŋsiga atu-tu Israel-ŋga, ti lau bata ma kêdôhônŋwaga yomso-ŋga hoŋ sêkac sa sêmbo dabuŋsiga ŋamata-ŋga ndê andu. Ma lau naŋ sêkôc Yisu dôŋ sêwê iŋ sêtêŋ andu dau si. 54 Pita kêsêlêŋ kêkuc Yisu mbo ahê, e gi sôc dabuŋsiga ŋamata-ŋga ndê andu ŋatuŋlôm gi. Ma iŋ ndöc sic whiŋ lau siŋ sêyob lôm dabuŋ-ŋga ŋatô ma kêsulu ya.

55 Dabuŋsiga atu-tu ma lau bata hoŋ naŋ sêndöc Sanedrin si toŋ, naŋ sêŋsalê yom bu sêŋgôliŋ pi Yisu ma sêkêŋ iŋ sip lau Rom-ŋga amba bu sêndic iŋ ndu. Magoc sêtap yom daŋ sa dom. 56 Bu lau daêsam sêtisa bu sêhoc yom tasan asê pi Yisu, magoc ŋac hoŋ si yom so dau. 57 Tiŋambu lau ŋatô sêtisa, ma sêkêŋ yom tasan pi iŋ bocdec bu, 58 “Yac aŋgô ŋgac dau sôm, ‘Lôm dabuŋ naŋ ŋamalac sêkwê sa, naŋ aô oc wasen su. Ma têŋ bêc titö-ŋga aô oc wakwê andu wakuc daŋ sa, naŋ gitôm andu naŋ ŋamalac sêkwê, naŋ dom.’” 59 Magoc ŋac tigeŋ-tigeŋ si yom so dau tiyham.

60 Goc dabuŋsiga ŋamata-ŋga tisa kalhac ŋalhu, ma ndac Yisu, “Am ŋgô yom dê sêŋgôliŋ pi am, me? Am bu ô yom, me mba?” 61 Tigeŋ Yisu gêm dau dôŋ ma ô yom dom. Goc dabuŋsiga dau ndac iŋ tiyham, “Am Mesaya dau, Anötö Atuŋgac, me mba?” 62 Ma Yisu sôm, “Aêc, aô dauŋ dindec. Ma tiŋambu mac oc alic ŋamalac ndê Atu ndöc Anötö Ŋaclai Ŋadau ndê amba andô-ŋga, ma sip meŋ ndöc dao ŋahô.”

63 Têŋ ndoc dabuŋsiga ŋamata-ŋga ŋgô yom dinaŋ, naŋ tac ŋandê atu dec kêc dau ndê ŋakwê kic ma sôm, “Yac dapönda yom daŋ tu taŋgôliŋ pi iŋ-ŋga dom. 64 Yom naŋ iŋ sôm pi dau, naŋ sac sambuc! Mac aŋgô su, ma mac gauc gêm bocke?” Ma ŋac hoŋ sêsôm pitigeŋ bu iŋ mbac ndu. 65 Lau ŋatô sêhu gasöp pi iŋ. Ŋac sêkic iŋ tandô ahuc ŋa po, goc sêtap iŋ ma sêsôm, “Am bu propet, naŋ sôm asê bu asa gic am.” Ma lau siŋ-ŋga sêkôc iŋ sêsa si, ma sêhi iŋ ŋa sö.

Pita sêc Yisu ahuc

(Mat 26:69-75; Luk 22:54-62; Jon 18:15-18, 25-27)

66 Têŋ têm dinaŋ Pita mbo andu dau ŋamakê, ma dabuŋsiga ŋamata-ŋga ndê awhê akiŋ daŋ kêsêlêŋ meŋ. 67 Iŋ gêlic Pita kêsulu ya mbo, goc

tahê iŋ ma sôm, “Am ŋgac naŋ kêkuc Yisu Nasaret-ŋga whiŋ.” ⁶⁸Magoc Pita pa dau ma sôm, “Mba, aö kayalê am nem yom ŋahu dom.” Dec iŋ tisa gi kalhac kêpiŋ tuŋlôm ŋagatam.

⁶⁹Malô goc awêhê akiŋ dau gêlic iŋ tiyham, ma sôm yom kaiŋ tigeŋ têtŋ lau naŋ sêlhac sêmpiŋ, “Alic ŋgac kêlê. Iŋ Yisu ndê lau si daŋ.” ⁷⁰Magoc Pita pa dau tiyham. Ŋasawa sauŋ ma lau naŋ sêlhac dindê, naŋ sêsôm, “Am ŋgac Galili-ŋga. Yomandô, am ŋac si daŋ.” ⁷¹Magoc Pita sôm ti ŋaŋga, “Mba! Aö bu wasôm yom tasan, naŋ goc Anötô ndic aö. Aö kayalê ŋgac naŋ mac asôm yom pi iŋ, naŋ dom andô!” ⁷²Ma ŋagahô dalec taŋ tilu-ŋga, dec Pita gauc gêm Yisu ndê yom bu iŋ oc sêc iŋ ahuc tidim tö su, goc dalec oc taŋ tidim lu-ŋga. Ma iŋ taŋ dau ndu-ndu.

Pailot kêsu Yisu

(*Mat 27:11-26; Luk 23:2-3, 18-25; Jon 18:29–19:16*)

15 ¹Têtŋ bêbêc ganduc, dabuŋsiga atu-tu ti lau bata ma lau naŋ sêndôhôn yomsu ti lau †Sanedrin-ŋga hoŋ si ŋalôm tigeŋ tu gêtŋ bocke bu sêkôm têtŋ Yisu-ŋga. Goc sêsô iŋ amba dôŋ ma sêwê iŋ sêtêtŋ Pailot si. ²Ma Pailot ndac iŋ, “Am lau Israel-ŋga si kiŋ, a?” Goc Yisu ô yom ma sôm, “Tôm naŋ am daôm sôm.” ³Têtŋ dinaŋ dabuŋsiga atu-tu sêŋgôliŋ yom daêsam pi iŋ. ⁴Dec Pailot ndac iŋ tiyham, “Am oc ô ŋac si yom, me mba? Ŋac sêŋgôliŋ yom daêsam pi am.” ⁵Tigeŋ Yisu ô yom dom, dec Pailot hêdaê.

⁶⁻⁷Têtŋ têtŋ dinaŋ ŋgac daŋ ndöc gapocwalô, naŋ ndê ŋaê Barabas. Muŋ-ŋga lau ŋatô sêli dau sa têtŋ lau Rom-ŋga naŋ sem gôliŋ lau Israel-ŋga, ma sic lau ŋatô ndu. Magoc lau Rom-ŋga sêkôc ŋac dôŋ ma sêkêtŋ ŋac sêndöc gapocwalô. Ma Barabas iŋ ŋac si daŋ.

Tôm yala hoŋ têtŋ ndoc lau Israel-ŋga si om atu Mwasinŋ Pasowa-ŋga hóc asê, naŋ Pailot kêkuc lêtŋ daŋ bocdec bu. Lau Israel-ŋga oc sêndac ŋgac gapocwalô-ŋga daŋ, dec iŋ oc êŋgapwêc iŋ su têtŋ ŋac. ⁸Lau daêsam naŋ sêkac dau sa têtŋ ndoc Pailot kêsahê Yisu, naŋ sêndac iŋ bu êŋgapwêc ŋgac gapocwalô-ŋga daŋ su êŋkuc ŋagôliŋ dinaŋ. ⁹⁻¹⁰Pailot kêyalê bu dabuŋsiga atu-tu sem lêmuŋ Yisu ŋambwa, ma tu dinaŋ-ŋga dec sêwê Yisu sêtêtŋ iŋ sêmeŋ. Bocdinaŋ iŋ gauc gêm bu êŋgapwêc Yisu su, dec ndac ŋac, “Mac atac whiŋ bu aö wahu Kiŋ Israel-ŋga siŋ têtŋ mac, me mba?” ¹¹Tigeŋ dabuŋsiga atu-tu sêŋgalôm lau toŋ atu dinaŋ e sêndac Pailot bu hu Barabas siŋ têtŋ ŋac. ¹²Goc Pailot ndac ŋac, “Bocdinaŋ aö oc wakôm sake têtŋ ŋgac dindec, naŋ mac asam bu lau Israel-ŋga si Kiŋ?” ¹³Ma sêmbwêc, “Ndic iŋ pi a gicso dau!” ¹⁴Magoc Pailot ndac ŋac, “Tu sake-ŋga? Iŋ kôm giso bocke?” Magoc sêmbwêc ti ŋaŋga, “Ndic iŋ pi a!”

¹⁵Pailot bu kôm lau atac ŋayham sa, dec gôlôc bu êŋgapwêc Barabas su têtŋ ŋac. Ma iŋ kêkiŋ Yisu têtŋ lau siŋ-ŋga bu sêhi iŋ ŋa sö, ma sêndic iŋ ndu pi a gicso dau.

Lau siŋ-ŋga sêsu Yisu susu
(*Mat 27:27-31; Jon 19:2-3*)

¹⁶Lau siŋ-ŋga sêwê Yisu sêsa Pailot ndê andu ŋamalacîlôm si, ma sêta yom bu lau siŋ-ŋga hoŋ sêkac sa. ¹⁷Goc sêkêŋ Yisu sôc ŋakwê kokoc baliŋ tôm kiŋ sêsôc, ma sêwhê wac kêŋ ma sêkêŋ iŋ uŋ gitôm suŋsuŋ. ¹⁸Goc ŋac sic hu sêmbwêc iŋ, “Ei! Datoc lau Israel-ŋga si kiŋ dindec sa maŋ!” ¹⁹Ma ŋac sêkôc a daŋ ma sic iŋ pi ŋagôlôŋ tidim daêsam, ma sêhê gasôp pi iŋ. Sêpôŋ haduc têtŋ iŋ, ma sêŋsau bu sêtoc iŋ sa. ²⁰Sêsu iŋ susu pacndê, goc sêkôc ŋakwê baliŋ dinaŋ su, ma sêkêŋ iŋ sôc dau ndê ŋakwê sa tiyham. Ma sêwê iŋ sêsa malac Jerusalem ŋamakê si, bu sêndic iŋ ndu pi a gicso dau.

Sic Yisu pi a gicso dau
(*Mat 27:32-44; Luk 23:26-43; Jon 19:17-27*)

²¹Lau siŋ-ŋga sêwê Yisu sêmbô seŋ, ma ŋgac daŋ kêselêŋ mbo seŋ akêŋ gameŋ ŋamakê-ŋga meŋ. Ma sêkac iŋ bu hóc Yisu ndê a gicso dau. Ŋgac dau ndê ŋaê Saimon. Iŋ Aleksanda lu Rupas damba, ma iŋ ndê malachu Sairin. ²²Sêwê Yisu sêsa si e sêhóc asê gameŋ naŋ sêsam bu Golgota. (Ŋaê dau danem kwi bu ‘Gameŋ Ŋakêcyha-ŋga.’) ²³Lau siŋ-ŋga bu sêkêŋ wain ti bu ŋamakic têtŋ Yisu nôŋ, magoc iŋ tec. ²⁴Bocdinaŋ sêhu siŋ, ma sic iŋ pi a gicso dau. Ma tiŋambu sêwhê iŋ ndê ŋakwê kôc ma sêpuc gapoc bu sêlic asa oc kôc ŋakwê bocke.

²⁵Ŋac sic iŋ pi a gicso têtŋ bêbêc, acgatu gitôm 9 kilok. ²⁶Ma yom naŋ lau bata Israel-ŋga sêŋgôliŋ pi iŋ, naŋ sêto pi bapia daŋ, naŋ sôm, “Lau Israel-ŋga si Kiŋ.” ²⁷⁻²⁸Ŋac sic ŋgac sac lu pi a gicso dau sêwhiŋ, daŋ kêgalêŋ Yisu amba andô-ŋga, ma daŋ kêgalêŋ gasê-ŋga. ²⁹Lau naŋ sêŋsêlêŋ si sêmeŋ, naŋ sêndahiŋ ŋasu ma sêtaŋ bôlê Yisu. Sêsôm, “Ei. Am ŋgac naŋ sôm bu seŋ lôŋ dabuŋ su ma kwê sa tiyham tôm bêc tó. ³⁰Dec sip akêŋ a gicso dau mweŋ, ma nem daôm sa!” ³¹Ma dabuŋsiga atu-tu ti kêdôhônŋwaga yomsu-ŋga bocdinaŋ sêsu iŋ susu ma sêsôm têtŋ dandi, “Iŋ gêm lau daêsam sa, tigeŋ gitôm dom bu nem dau sa. ³²Yac bu alic Mesaya, lau Israel si kiŋ dindec-ŋga, sip akêŋ a gicso dau meŋ, dec yac oc akêŋ whiŋ iŋ.” Ma ŋgac lu naŋ sic pi a gicso sêwhiŋ Yisu, naŋ sêsu iŋ susu bocdinaŋ.

Yisu mbac ndu
(*Mat 27:45-56; Luk 23:44-49; Jon 19:28-30*)

³³Têtŋ ac kalhac lhu, ŋasec atu gêm gameŋ sambuc ahuc e acgatu gitôm 3 kilok telha-ŋga. ³⁴Ma têtŋ 3 kilok Yisu mbwêc awaha atu, “Eloi, Eloi, lama sabaktani?” (Yom dau danem kwi bu, ‘Aö neŋ Anötö, aö neŋ Anötö, tu sake-ŋga am hu aö siŋ?’) ³⁵Lau naŋ sêlhac sêmpiŋ, naŋ sêŋgô iŋ

ņapep dom ma sêsôm, “Aņgô, iņ ta propet Elaija.” ³⁶Ma ņgac daņ kêtî gi kêtį sôwam daņ sip wain ņamakic, ma sô dôņ pi a baliņ daņ. Goc iņ puc pi Yisu whasuņ bu iņ nôm ma sôm, “Dahu iņ siņ ma dalic, Elaija oc sip meņ ma kôc iņ su, me mba.”

³⁷Têņ têm dinaņ Yisu mbwêc awha atu ma mbac ndu. ³⁸Ma têtį dinaņ po baliņ naņ kêgalêņ lôm dabuņ ņalôm, naņ dau kic gi lu, kalhac ņahô ma gi têtį ņapu-ņga. ³⁹Ma ņgac bata siņ-ņga naņ kalhac Yisu aņgô-ņga, naņ gêlic iņ ndê mbac ndu ņalêņ, goc sôm, “Yomandô, ņgac dindec iņ Anötö ndê Atu.”

⁴⁰Lauwhê ņatô sêlhac ahê ma sêlic gêtį hoņ dinaņ. Maria Magadala lu Maria naņ Jems sauņ lu Joses dinda, ma Salome sêmbo sêwhiņ ņac. ⁴¹Muņ-ņga, têtį têm Yisu mbo gameņ Galili-ņga, naņ lauwhê dinaņ sêtįkuc iņ, ma sem akiņ iņ. Ma lauwhê daêsam naņ sêpi Jerusalem sêwhiņ Yisu, naņ sêlhac sêwhiņ ņac.

Josep kêtį Yisu ndê ņamlaj yêc hoc ņasuņ
(*Mat 27:57-61; Luk 23:50-56; Jon 19:38-42*)

⁴²Bêc naņ sic Yisu ndu, naņ lau Israel-ņga si bêc sêmasaņ dau tu Sabat-ņga.ⁱ Bocdinaņ têtį telha, ⁴³ņgac bata Israel-ņga daņ ņaê Josep gauc gêm bu êņsuhuņ Yisu ņamlaj. Josep iņ ņgac akêtį malac Arimatiya-ņga, ma iņ lau Sanedrin-ņga si ņgac tiwaê daņ naņ kêtį bata Anötö ndê gôliņ bu meņ sa tiawê. Iņ ndê ņalôm pêtį dôņ, dec têtį Pailot gi ma ndac Yisu ndê ņamlaj. ⁴⁴Yom dau kôm Pailot sö, ņahu bu iņ kêtįyalê dom bu Yisu mbac ndu su. Bocdinaņ iņ ta lau siņ si ņgac bata ma ndac iņ bu Yisu mbac ndu su, me mba. ⁴⁵Iņ tap sa bu Yisu mbac ndu su, dec gôlôc têtį Josep bu kôc Yisu ndê ņamlaj sa ndi êņsuhuņ. ⁴⁶Josep kôc po ņayham daņ naņ iņ gêmli muņ su, goc sa gi ma kôc Yisu su yêc a gicso dau, ma kêpaņ iņ ahuc ņa po dau. Ma iņ kôc iņ sa gi ma kêtį iņ yêc sêhô naņ lau sêlêņ gwanaj su yêc hoc ņalôm. Goc iņ kêtį hoc daņ gi ndôc sê awha dau ahuc. ⁴⁷Maria Magadala lu Joses dinda Maria sêlic Josep kêtį Yisu ndê ņamlaj yêc hocsuņ dinaņ.

Yisu tisa
(*Mat 28:1-10; Luk 24:1-12*)

16 ¹Bêc Sabat-ņga meņ gi su, goc Maria Magadala lu Jems dinda Maria, ma Salome semli gêtį malu bu sênem oso Yisu ndê ņamlaj. ²Têtį wake ņabêc ņamata-ņga dinaņ sêti têtį bêbêc ganduc bu sêtêtį sêhô sêndi. Ac pi meņ su ma sêņsêlêņ sêmbo seņ, ³ma sêndac dandi, “Asa oc nem yac sa ma êmpi hoc naņ yêc sê awha, naņ su?” ⁴Tigeņ

ⁱ 15:42 Lau Israel sêsôm bu têtį ndoc ac gi sip têtį bêc naņ muņ bêc Sabat-ņga, naņ têm dau gic hu bêc Sabat-ņga. Bocdinaņ ņac bu sêņsuhuņ lau batê muņ ac ndi sip.

sêhóc tandô sa, ma sêlic hoc atu dau yêc sê awha dom. ⁵Bocdinaŋ dec sêsôc sêhó ñalôm si. Sêlic ñgac batac daŋ naŋ sôc ñakwê sêsêp, ma ndöc andô-ŋga, dec sêsö ñandô. ⁶Magoc ñgac dau sôm, “Asö dom. Mac aŋsalê Yisu Nasaret-ŋga, naŋ sic iŋ ndu pi a gicso dau. Iŋ yêc dec dom, iŋ tisa su. Alic mala naŋ sêkêŋ iŋ yêc, naŋ sawa. ⁷Magoc andi ma asôm têtŋ iŋ ndê sêŋomi ma têtŋ Pita bu iŋ oc muŋ mac têtŋ Galili ndi. Mac oc alic iŋ yêc dindê, tôm yom naŋ iŋ sôm têtŋ mac muŋ su naŋ.” ⁸Yom dinaŋ kôm awê lu dau sêntitec ti sêhêdaê ñandô. Sêsa akêŋ sêhó, ma sêlhö sênti si. Magoc sêtöc dau dec sêsôm yom têtŋ ñamalac daŋ yêc seŋ dom.

⁹Têtŋ têtŋ Yisu tisa têtŋ Sonda bêbêc, iŋ hoc dau asê ti-ŋamata-ŋga têtŋ Maria Magadala, awê naŋ muŋ-ŋga iŋ soc ñalau sac 7 su yêc iŋ ñalôm. ¹⁰Ma Maria gi ma sôm asê têtŋ lau naŋ sêŋkuc Yisu, naŋ sêkôm daŋgibo ti sêtaŋ sêmbo. ¹¹Maria sôm têtŋ ñac bu iŋ gêlic Yisu ma iŋ mbo tali tiyham. Magoc ñac sêkêŋ whiŋ dom.

¹²Tiŋambu Yisu ndê ñgac-sêŋom lu sêhu Jerusalem siŋ ma sêŋsêlêŋ sêmbo seŋ, ma Yisu hoc dau asê têtŋ iŋlu gitôm ñgac aŋgô batac daŋ. ¹³Dec iŋlu sêmbo si ma sic miŋ têtŋ sêŋomi ñatô, magoc ñac sêkêŋ whiŋ iŋlu dom bocdinaŋ.

Yisu kêtŋ gwelêŋ têtŋ lau naŋ sêŋkuc iŋ

¹⁴Tiŋambu ñgacsêŋomi 11 seŋ gêtŋ sêmbo sêwhiŋ dau, ma Yisu hoc dau asê têtŋ ñac. Ma iŋ sôm ñac tu ñac si ñalôm ñadandi-ŋga, bu sêkêŋ whiŋ lau naŋ sêlic iŋ têtŋ ndoc iŋ tisa su, naŋ dom. ¹⁵Goc iŋ sôm têtŋ ñac, “Atôm nom ñagameŋ sambob andi, ma ahoc ñawaê ñayham asê têtŋ lau hoŋ. ¹⁶Lau naŋ sêkêŋ whiŋ ma sêliŋ saŋgu, naŋ oc sêtap Anötö ndê mwasiŋ nem ñac si-ŋga sa. Magoc lau naŋ sêkêŋ whiŋ dom, naŋ oc sêtap iŋ ndê matôc sa. ¹⁷Ma Anötö oc kêtŋ ñaclai têtŋ lau naŋ sêkêŋ whiŋ, dec oc tôm bu sêkôm gêtŋ dalô bocdec bu. ñac oc sêkôm gwelêŋ sênem aö aŋôŋ, ma sêsoc ñalau sac su yêc lau. ñac oc sêsôm yom awê wakuc-ŋga naŋ sêndôhôn muŋ su dom. ¹⁸ñac bu sêkôc mboc sac sip ñac amba me sênôm bu ñamalac, dec oc kôm ñac sêtisac dom. Ma ñac oc sêkêŋ amba sac lau gêmbac, ma sêkôm ñac ñayham sa.”

¹⁹Yisu sôm yom dinaŋ têtŋ ñac su, goc Anötö kôc iŋ su yêc nom. Iŋ pi undambê gi, ma ndöc Anötö ndê amba andô-ŋga. ²⁰Ma iŋ ndê sêŋomi sêsa si, ma sêhoc ñawaê ñayham asê yêc gameŋ hoŋ. Ma Pômdau mbo whiŋ ñac, ma kêtŋ ñaclai têtŋ ñac bu sêkôm gêtŋ dalô atu-tu tu bu puc yom naŋ sêhoc asê, naŋ dôŋ-ŋga.